

مؤلف القضية

الأشخاص

- ١ - سرجى كونسنتينوفيتش بتروف
- ٢ - ايفان ايفانوفيتش
- ٣ - أبو كسكته
- ٤ - أبو برنيطة خوص
- ٥ - السكرتين
- ٦ - السائق ساشا
- ٧ - كونسنتين سيرجيفيتش
- ٨ - نحات
- ٩ - مصور
- ١٠ - صحفى
- ١١ - مايسترو
- ١٢ - أنا نيكولايفنا
- ١٣ - ماريا أندريفنا
- ١٤ - تاتيانا فاسيلفنا

- ١٥- لوسسيا
- ١٦- سكرتير كونسنتين سيرجيفيتش
- ١٧- جرسونا
- ١٨- ايفان سيمونوف
- ١٩- الكسى سيمونوف
- ٢٠- نينا سيمونوفا
- ٢١- موظفة استعلامات الفنلق
- وآخريـن

الفصل الأول

● المشهد الأول *

(يدخل بتروف وأبو كسكتة وأبو برنيطة خوص)

بتروف : (للمشاهدين) مساء الخير يا رفاق

أبو برنيطة خوص : (للمشاهدين) مساء الخير يا حضرات الرفاق

أبو كسكتة : (للمشاهدين) مساء الخير .

بتروف : جرت أحداث هذه المسرحية فى إحدى المدن الصغيرة .

كل الأحداث جرت معى شخصيا . هل تخمنون من أنا ؟

من الممكن أن أكون أمينا للجنة الحزب ، أو رئيسا لمجلس

المدينة . أو مديرا لمصنع لعب الأطفال ، أو مديرا لفابريكة

نسيج . ويمكن أن أكون رئيسا لتحرير جريدة محلية .

ما حدث لى كان يمكن أن يحدث لى من هؤلاء . لكن هذه

الأحداث لها أهمية كبيرة لأنها حدثت لى أنا شخصيا . فهل

عرفتم شخصيتى ؟ أنا أهم شخصية فى المدينة كلها .

أبو كسكتة : ويجرى ايه لو قال لنا دوغرى هو مين وشغلته ايه ؟

أبو برنيطة خوص : تبقى غلطان خالص لو كنت فاكرهم كلهم

(يشير الى المشاهدين) بلده زيك . حضرات المتفرجين

بتلميحة خفيفة فهموا كويس جدا مركز الرفيق المبجل

بتروف فى مدينتنا .

* الاسم الاصلى للمسرحية : هل كان ايفان ايفانوفيتش موجودا ؟

(المترجم) .

أبو كسكته : أنا مباحبش التلميح

أبو برنيطة خوص : حضرته مايبحبش التلميح .. ليه دا التلميح
الذكي فن .. دا تقريبا عمل فنى .. تكونش عاوزنا نتكلم
بطريقتكم فى الاجتماعات .

أبو كسكته : هو أنتم بتتكلموا بطريقة تانية ؟

أبو برنيطة خوص : على العموم مش بطريقتكم . احنا بتتكلم
بلباقة .. ومينخرجش عن حدود الادب .. احنا .. لامواخذة
يارفيق بتروف .. قطعنا حديثك .. تفضل لو تكلمت قدمنا
للمتفرجين .

بتروف : (يقدم للمشاهدين أبو برنيطة خوص) أبو برنيطة
خوص

أبو كسكته : رجعنا تانى للتلميح

أبو برنيطة خوص : (للمشاهدين) عظيم جدا .. مش كده
برضو .. طبعا فهمتم .. أنا يا حضرات المتفرجين ..

بتروف : (يقدم للمشاهدين أبو كسكته) أبو كسكته

أبو كسكته : أنا مبعترفش بالطريقة دى فى التقديم . تلاقى
معظمكم لما شافوا الكسكته بتاعتى قالوا : أهو ذا فى المسرحية
حيمثل الشعب البسيط . مامعنى الشعب البسيط فى مجتمعا
الاشتراكى ؟ بمنتهى البساطة أنا الشعب .. أنا العامل
والفلاح والمثقف . ودا بقى الشخص الى ينطبق عليه المثل
الروسى : طويل اللسان قليل العقل . وهو الى بيسمىنى .
الشعب البسيط .

(يدخل السائق)

السائق : حنتاخر يا رفيق بتروف ؟

أبو برنيطة **خوص** : (يقدم السائق للمشاهدين) داساشا سواق
الرفيق سرجى كونستنتينوفيتش بتروف .

أبو كسكته : يعنى سواق العربية بتاعة المؤسسة الى بيشتغل
فيها بتروف .

السائق : يللا بينا يا رفيق بتروف .

أبو برنيطة **خوص** : مستعجلين ليه ؟ على أقل من مهلكم .. هو
أنتم بتمضوا فى دقاتر الحضور والانصراف ؟

بتروف : الحقيقة أنا متعود أروح الشغل قبل الميعاد .

أبو برنيطة **خوص** : هو يعنى الشغل بعيد قوى .. دى ديتهها
ساشا يدوس شوية على البنزين ..

السائق : ماأقدرش .. الرفيق بتروف مدينى تعليمات مشددة
بانى أحترم قوانين المرور زى أى سواق عادى . سواقين
التاكسات واخدين حريتهم عنى . ساعات ازهق وأقول
ياواد متسيب الشغلة دى وتروح الاسعاف .. على الأقل
الواحد مايبقاش يتلطم ورا حطة أوتوبيس .

بتروف : لما يكون فيه داعى بنجرى زى المجانين لكن مادام
مافيش داعى .. على العموم يللا بينا لحسن نتاخر بصحيح
.. بيتهياالى سكتنا واحده .

(يخرج السائق وأبو كسكته معا)

أبو برنيطة **خوص** : (يتراجع الى الوراء باحترام لكى يسبقه
بتروف) تفضل حضرتك .. لا .. لا يمكن .. تفضل

بتروف : (يتأبط ذراع أبو برنيطة خوص) يللا بينا

(يخرجان معا)

(حجرة السكرتارية المؤدية الى مكتب بتروف . منضدتان
احدهما لضاربة آلة كاتبة والثانية للسكرتير . ترى تاتيانا
وهي تنظف السجادة بكهنة مبللة . يدخل بتروف) .

بتروف : (يدخل مكتبه) صباح الخير ياتاتيانا

تاتيانا : صباح الخير يا رفيق بتروف . . . حالا حخلص

بتروف : لا على مهلك . . . متستعجليش . . . آمال فين الكنيسة
الكهربية ؟

تاتيانا : عطلانة وماحدث عارف يصلحها

بتروف : طيب هاتيها نشوفها

(تخرج تاتيانا وفي هذه اللحظة تدخل ماريا ، تجلس الى
مكتبها ثم ترفع غطاء الآلة الكاتبة . الارهاق وآثار الدموع
تبدو على محياها . . . تدخل تاتيانا ومعها الكنيسة الكهربائية) .

تاتيانا : (وهي تتعجل دخول مكتب بتروف)

صباح الخير يا ماريا

ماريا : صباح الخير ياتاتيانا

تاتيانا : (وهي تدخل المكتب) وريتها للكهربائي قال لي دي
عاوزه ٣ أيام شغل .

بتروف : (يفحص الكنيسة ثم يتجه الى مكتبه ويخرج من أحد
الأدراج « صندوق العدة » ويشرع في تصليح الكنيسة)
لو ماكانتش المكانس والثلاجات دي دايمًا تعطل كان زمانى

نسيت صنعتي الأصلية .. عال قوى .. بقى الشغلة
م. ناخدش ٣ دقائق ويقول عاوزه ٣ أيام .. لازم نحقق معاه فى
اجتماع التنظيم .. طيب ركبى الكبس لو سمحت

تاتيانا : (تشغل المكينة) عال العال .. تسلم ايديك يا رفيق
بتروف دى بقت زى الجديدة تمام .

بتروف : (بغبطة) صحيح ؟

تاتيانا : بالشرف صحيح .. وأحسن من الجديدة كمان

بتروف : لا واسعه دى شويه

تاتيانا : أبدا والله .. دى الحقيقة

بتروف : على العموم دا شئ يسر

(تبدأ تاتيانا فى تنظيف السجادة بالمكنسة الكهربائية)

(بتروف يرتب الملفات الموضوعة على مكتبه ثم يخرج الى
حجرة السكرتارية)

صباح الخير ياماريا

ماريا : صباح الخير سرجى كونستنتينوفيتش

بتروف : ازى صحة ابنك ؟ درجة حرارته كام النهارده ؟

ماريا : الصبح كانت ٣٨

بتروف : روحى انت فورا وأنا بعد ساعة جبت العربية تنقله
المستشفى .. أنا خلاص اتفقت مع الدكتور .. مالكيش حق
أبدا تستنى لحد دلوقتى .. روحى أنت بس .. واذاجه
شغل مستعجل أكتبه أنا بنفسى

ماريا : أنا خايفه خالص يا رفيق بتروف

بتروف : عى المستشفى تخوف .. ثم اطمنى .. ماحدثش حيعمل
له عملية جراحية بدون موافقتك *

ماريا : متشكرة جدا يارفيق بتروف

بتروف : على ايه الشكر .. بس يللا روحى انت بسرعة .
تاتيانا : (وقد انتهت التنظيف تقرب من بتروف) من بكره حاخذ
أجازة *

بتروف : أنا عارف .. انت فعلا محتاجة للراحة .. ياسلام لو
تقضى أجازتك فى جاجرا على البحر الاسود .. الجو هناك
مدهش فى الربيع

(تخرج تاتيانا ويدخل السكرتير حاملا ملف الوارد)

السكرتير : صباح الخير يارفيق بتروف

بتروف : أهلا وسهلا .. دى البوسته ؟

السكرتير : أيوه

بتروف : عملت طيب *

(يجلس فى مواجهة السكرتير ثم يبدآن معا فحص الرسائل
يفض مطروفا ويقرأ الرسالة باهتمام شديد)

تعليمات الوزارة صريحة بأننا لازم ننتظر على مايجينا قرار
اللجنة .. وبعدين نبقى نبتدى التصليح .. لكن مش كل
تصليح ممكن يتأجل لحين صدور قرار اللجنة .. خلى القرار
ييجى بعد التصليح مايجراش حاجة أبدا .. أنا حاخذ
الموضوع دا على مسئوليتى الشخصية .. لازم نفتح فورا

اعتماد للتصليح .. والشكليات خليها على أقل من مهلها .
السكرتير : بصراحة انت بتحمل نفسك مسئوليات كثيرة
وأنا خايف عليك .

بتروف : ولا يهمك .. أنا نقتى فى الناس اتبر من نقتى فى
الورق أنا عندي الواحد يغلط أحسن ما يبقى عبد للروتين ..
صحيح أن الروتين بيريح المسئولين لكن دا طبعا على حساب
العمل ..

السكرتير : أرجوك ماتسيشش فهمى .. نى الواقع أنا شخصيا
أحبي فيك من كل قلبى يارفيق بتروف الشجاعة فى التصرف
..والحقيقة انك .. مش عارف أعبر ازاى .. قصدى
حضرتك تعتبر ..

بتروف : (بتبرم لا يخلو من الرضى) كفاية .. كفاية .. (يأخذ
مجموعة أوراق ويتوجه الى مكتبه وعند عتبة الباب يتوقف
ليخاطب السكرتير) كنت عاوز تقول أى حاجة تانية ؟

السكرتير : أوو .. أصل يعنى .. كنت عاوز أقول أن الشقق
الى فى العمارة الجديدة حتتوزع قريب .. وحضرتك زرتنا
وشفت بنفسك ايه شكل الشقة الى احنا ساكنين فيها .
بتروف : انت عارف ان أنا ماليش أى علاقة بتوزيع الشقق .

السكرتير : أيوه .. بس بقول يعنى لو حضرتك تتكرم وتتصل
بالتليفون ب

بتروف : متأسف . أنا مش من أنصار ان عضو فى الحزب يتصل
بعضو تانى عشان يمشى موضوع عضو تالت . مشكلة
الاسكان فى بلدنا مشكلة معقدة . وطبعا أعضاء الحزب لابد

يكونوا أول من يتحمل المتاعب .. وبالمنااسبة فيه ناس كثير
جدا ساكنين ومستحملين وماييدروش على وسايط (يدخل
حجرتة ويغلق الباب)
السكوتير : (أمام الباب الموصد فى وجهه) متأسف يا رفيق
بتروف .

● المشهد الثانى

(يدخل ايفان .. بينه وبين بتروف بعض التشابه)
ايفان : اسمى ايفان ايفانوفيتش . أنا عدو بتروف زى ما الدود
عدو التفاح والصدأ عدو الحديد والسل عدو الانسان ..
يفكر أعمل ايه فى بتروف عشان يفتكرنى طول عمره .
عشان ما ينسانيش طول عمره . عشان يتعذب باستمرار .
أنا مش حسالكم انتم .. للأسف معظمكم لا يحب الشر
لآخرين . لكن أسأل مين ؟

أبو برنيطة خوص : أهلا ايفان ايفانوفيتش .

ايفان : أهلا .

أبو برنيطة خوص : النهارده بالليل أنا حلقى محاضرة فى متحف
المدينة ويشرفنى ويسعدنى وجودك يا ايفان ايفانوفيتش ..
موضوع المحاضرة : «هل من الضرورى أن يكون للعمل الفنى
بطل ايجابى؟» . وأنا أرى طبعا ضرورة وجود بطل ايجابى .
(يدخل أبو كسكته)

أبو كسكته : نبارككم سعيد (متوجها الى أبو برنيطة خوص)
شفت لوحة الفنان شيشكين « الصباح فى غابة الصنوبر »

أبو برنيطة خوص : شفتها طبعا .. ليه ؟

أبو كسكته : فيها أربع ديب .. واحد كبير وثلاثة صغيرين ..
فين البطل الايجابى ؟ والا اللوحة متعتبرش عمل قنى ؟ هاه
.. قلت ايه ؟

أبو برنيطة خوص : فى رأى ان البطل الايجابى فى اللوحة هو
المتعة الى أنا بحس بيها . وانت ايه رأيك يا ايفان
ايفانوفيتش ؟

ايفان ايفانوفيتش : أنا شخصيا فهمى فى الموضوعات دى محدود
جدا . . لكن فيه سؤال عاوز أوجهه لكم انتم الاثنين .

أبو برنيطة خوص : اتفضل يا عزيزى
أبو كسكته : اسأل . .

ايفان ايفانوفيتش : ما هى أكبر مصيبة يمكن أن يبتلى بها
انسان ؟

أبو برنيطة خوص : أكبر مصيبة ؟

ايفان ايفانوفيتش : أيوه أكبر مصيبة

أبو كسكته : عدم الوفاء بالوعد .

أبو برنيطة خوص : النقد اللاذع على صفحات الجريدة المركزية .

أبو كسكته : السجن .

أبو برنيطة خوص : الرفت من العدل .

أبو كسكته : الجهل .

أبو برنيطة خوص : عدم رضا الرؤساء .

أبو كسكته : الطرد من الحزب .

أبو برنيطة خوص : النقل من العاصمة للاقاليم .

أبو كسكته : صدمة عاطفية !

ايفان ايفانوفيتش : رائع !

(يمر بتروف متأبطا ذراع لوسيا وقد مالت بخدها على

كتهف . ايفان يخاطب « أبو كسكته » ايه الى انت قلته ؟
صدمة عاطفية . . بس أهى دى أكبر مصيبة ! شفتهم مين الى
كان فايت ؟

أبو برنيطة خوص : بتروف مع لوسيا

أبو كسكته : مع البطلة الرياضية لوسيا .

ايفان ايفانوفيتش : بتروف واقع فى حب لوسيا لشوشته . .
زى المجنون فى حبها

أبو كسكته : الحب لازم يكون بجنون . . حب ايه ده الى يبقى
بعقل ؟

ايفان ايفانوفيتش : وصاحبتنا رخره بتجبه زى ما بيعبها ؟

أبو كسكته : وما تجبوش ليه ؟ هوه فيه حد ما بيعبش بتروف ؟

أبو برنيطة خوص : أنا شخصيا أعتقد انه لا تجوز الثقة بأى
امراة خاصة اذا كانت شابة . على رأى شكسبير : « النساء
والتفاهة اسمان لشيء واحد » !

أبو كسكته : اذا اتكلمنا عن الخيانة يبقى لازم نعرف أن الرجال
مشهورين بيها أكثر من الستات . وعلى العموم المسألة دى
بتتوقف أساسا على شخصية الانسان

ايفان ايفانوفيتش : صدمة عاطفية . . صدمة عاطفية (للمشاهدين)
خلاص تقدرنا تعتبرنا أن بتروف انتهى (مخاطبا أبو كسكته
وأبو برنيطة خوص) سيبنونى لو سمعتم على المسرح لوحدى
(أبو كسكته وأبو برنيطة خوص يخرجان)

(للمشاهدين مشيرا الى شاشة) ودلوقتى حعرض لكم أفكارى.

على الشاشة .. اتفرجوا .. (على الشاشة مناظر تعرض
بألفانوس السحري .. المنظر الأول : لوسيا جالسة على أريكة
في إحدى الحدائق . هي مستغرقة في حلم وردى .. يظهر
القمر في السماء) أدى لوسيا بتحلم على ضوء القمر ..
بتحلم بمين ؟ ببتروف طبعاً . لكن أحلامها مش حتطول ..
شوفوا

(على الشاشة علامة استفهام ضخمة)

علامة استفهام كبيرة داخل الرأس . ازاي أقدر أزرع الشك
في عقل بتروف ؟ . ازاي أخليه يبتدى يشك فيها ؟ أنا فكرت
في كل الأساليب الممكنة ابتداء من الياطرة المشهورة
لديدمونة حتى سرقة الجوابات زى مابتشوفوا في السينما .
أنا بحثت كل الأساليب فإيه الأسلوب اللي اخترته ؟

(على الشاشة علامة استفهام ضخمة)

الأسلوب اللي اخترته مش بس حيزرع الشك في عقل بتروف
لكن كمان حيطير البنت منه . شوفوا ..

(على الشاشة منظر لايفان ايفانوفيتش يتأبط ذراع لوسيا
بينما هي تسند رأسها على كتفه . اللقطة من الأمام .. ومن
بعيد تتردد أغنية رقيقة)

انتم طبعاً نفسكم تعرفوا ازاي أنا علقت البنت منه ؟ عاوزين
تعرفوا ليه ؟ مجرد فضول ؟ واللا أنتم كمان بتدبروا حاجة
زى كده ؟ لكن دا موضوع تانى خارج عن اطار المسرحية .
نرجع للموضوع الأصلي . دلوقتي حتشوفوا ازاي أنا قضيت
على بتروف .

المنظر الرابع على الشاشة : بتروف ينام على سرير وقد
تسمرت عيناه على السقف • منظره ينم عن التهالك •

أول بتروف ما يرجع من الشغل بيروح مرمى على السرير ••
ويقعد ساعات مبخلق فى السقف وهو عمال يفكر كل الأشعار
الحزينة الى عارفها •

صوت بتروف : (مقتطفات من أشعار تعبر عن الكآبة والأسى)

ايفان ايفانوفيتش : (للمشاهدين) شايفين

(على الشاشة منظر لبتروف يتمشى فى الشارع ليلا وحيدا
شارد الذهن)

أهو بالشكل ده بيتنه يتسكع فى الشوارع لحد الصبح ••
وحيفضل يتعذب كده لحد ما يموت

(على الشاشة منظر آخر لبتروف على شاطئ البحر بصحبة
فتاة أخرى • تبدو على وجهيهما ادارات السعادة •)

(ايفان يواصل مخاطبة المشاهدين دون أن يرى المنظر الذى
تغير على الشاشة خلف ظهره) •

تبقى الصدمة العاطفية هى أكبر مصيبة يبتلى بها انسان !

(ينظر الى الشاشة فتأخذه المفاجأة)

ايه ده ايه ده؟ بتروف مع بنت تانية؟ •• بتروف مع واحدة
غير لوسيا على شاطئ البحر؟ والاثنين مبسوطين !! معنى كده
ان الصدمة العاطفية مياش •• اذن أنا لو طيرت منه لوسيا
حيتعذب شويه وبعدين يهدا •• يبقى أبو كسكته خدعنى
(يصرخ فى اتجاه الكواليس) يا أبو كسكته

(يدخل أبو كسكته ويختفي المنظر)

(مخاطباً أبو كسكته) .. تعال هنا .. انت مش قلت لي ان

الصدمة العاطفية هي أكبر مصيبة في حياة الانسان ؟

أبو كسكته : أيوه .. لكن كل داء وله دواء

ايفان ايفانوفيتش : أنا عاوز بلوة ملهاش علاج .. حاجة كده زي
السرطان

أبو كسكته : بكرة يلاقوا له علاج

(يدخل أبو برنيطة خوص)

ايفان ايفانوفيتش : عاوز بلوه عمرهم مايقدرُوا يلاقوا لها علاج

أبو برنيطة خوص : تلويث شرف انسان برىء

ايفان ايفانوفيتش : تلويث الشرف .. أيوه .. رائع .. اعملوا

معروف شـوفوا لي قلم وورقة وظرف جواب عليه ورقة
بوسته *

أبو كسكته : انت ناوى تعمل ايه ؟

ايفان ايفانوفيتش : حكتب اشارة مستعجلة

أبو كسكته : قصدك وشاية

ايفان ايفانوفيتش : لا أبدا .. أنا عاوز أمنع مواطن من ارتكاب

جريمة .. جريمة استغلال مركزه في تبديد أموال الشعب

أبو برنيطة خوص : بالصورة دي العملية تاخد طابع مختلف تماما

أبو كسكته : يعنى عاوز تكتب شكوى كيدية في حق بتروف

ايفان ايفانوفيتش : (يبدأ في الكتابة) أيوه .. (يقرأ مايكتبه

بصوت مسـوع) وأخذ نسبة مئوية من المبلغ الذي قرر

صرفه دون انتظار قرار اللجنة ..

أبو كسكتة : دا افتراء .. بتروف ماخذش لنفسه أى حاجة .
ايفان ايفانوفيتش : ولو ! انما أنا حكيت كده .. وحكيت كده
بانذات لأنه ماحصلش . خليه ييجوا يحققوا .. ومين عارف
يمكن يقبضوا عليه كمان .

أبو كسكتة : مش شرط انهم يقبضوا عليه .
أبو برنيطة خوص : لكن هو فعلا أمر بالصرف من غير تعليمات
اللجنة .. دى واقعة ثابتة .

ايفان ايفانوفيتش : ولحد مايموت حيفضل يتعذب لأن شرفه ملوث
أبو كسكتة : مش حيتعذب .. وحتى لو اعتقلوه ضرورى فى النهاية
حيعرفوا الحقيقة ويفرجوا عنه .. وعلى فرض أنه أدين ..
لازم حيجي اليوم الى يردوا فيه اعتباره .. ثم هو بمجرد
مايعرف ان دا عمل من تدبير أعدائه نفسيته حترتاح وتنتهى
آلامه .

ايفان ايفانوفيتش : اتفكر .. حاجة تجنن (يمزق الورقة قطعاً
صغيرة) يعنى مافيش فائدة .. أمال الواحد يعمل ايه ؟ . يخترع
ايه ؟ أقتل بتروف .. لازم أخلص عليه (مخاطباً أبو كسكتة
وأبو برنيطة خوص) اعملوا معروف سيبوني لوحدى ٥ دقائق
على المسرح .

(أبو كسكتة وأبو برنيطة خوص يخرجان)

(للمشاهدين) لازم أقتل بتروف بطريقة ماتركش أى أثر
أقتله ازاي ؟ بسكين ؟ . بالرصاص ؟ أخنقه ؟ أبطال شكسبير
أكثرهم كانوا بيقتلوا بعض بالسهم .. وليرمنتوف كمان كان
بيخلص على أبطاله بالطريقة دى . اذن السم أحسن وسيلة ..

أسم بتروف • لكن لازم أنا الى احضر السم بنفسى •• دقيقة واحدة •• (يخرج ثم يعود بعد برهه وهو يدفع عربة صغيرة عليها بعض الكتب وأنايب اختبار وجهاز تقطير) كتب كيمياء تصف كل طرق تحضير السموم •• أنا حدرس كل التراكييب المعروفة لتحضير أفنك أنواع السموم ولازم أختار نوع يكون مالوش لون ولا طعم ولا رائحة •• وكمان لازم ما يتركش أى أثر (يقرأ ويمارس التجربة فى آن واحد •• الكتاب فى يد وجهاز التقطير فى اليد الأخرى) بالطريقة دى حصل على سم مفعوله أكيد •• بتروف ما يستحملش منه نقطة واحدة (تنزل قطرة من أنبوبة التقطير الى الكأس) ايه العمل دلوقتى علشان بتروف يبلغ النقطة دى ؟ وجدتها ! (يخرج ثم يدخل بعد قليل مرتديا زى بائع جيلاتى) أدبنى بقيت بيع جيلاتى •• أدلق نقطة على كباية الجيلاتى • (يصب نقطة على أحد أكواب الجيلاتى • يضع الكوب على راحة يده ثم يضم يديه الى صدره منتظرا •) بس • دلوقتى ييجى بتروف مع لوسيا •

(بتروف ولوسيا يدخلان)

لوسيا أكيد حتطلب جيلاتى •

(لوسيا تشير الى بتروف برغبتها فى كوب جيلاتى)

بس المهم ما أغلطش وأدى الجيلاتى المسمم للوسيا • أهى الكباية متعلمة أهه •• (يعطى لوسيا الجيلاتى) وأدى المسمومة لبتروف (يمد يده الى بتروف بالكوب المسمم)

(بتروف يهز رأسه رافضا)

هو مارفضش عشمان فهم .. كل ما هناك أنه مالوش مزاج
لديلاتي لكن أنا حفضل ألح عليه لغاية لوسيا ماتاخذ
الجيلاتي المسموم وتناوله لبتروف

(لوسيا تبتسم ثم تأخذ الكوب المسموم وتناوله لبتروف)
أهى بايديها بتقتل حبيبها .

(بتروف يتذوق الجيلاتى ثم يسقط)

أنا لازم تقلت العيار

(لوسيا تفرك يديها بعصبية)

بتروف ييموت .. العذاب باين على وشه .. الموت لعبة
سخيفة .. أما أوطى أشوفه (ينحنى)

مات طبعاً .. لكن العذاب فضل نائية مرسوم على وشه ..
مش دا الى أنا كنت عاوزة .. أنا لازم أصحيه وأرجع أموته
(يهز بتروف) ماهوش عاوز يصحى .. مافيش فايدة ..
مش حايصحى .. احنا ليه مابنقدرش نموت الانسان الا
مرة واحدة . دلوقتى لوسيا تضم الجسم الميت لصدرها ..
وعمرها مااحتفصل عنه .

(لوسيا تأخذ بتروف وتخرج)

القتل ماينفعش .. مش دا الى يرضينى . أعمل ايه ؟
اختراع ايه ؟ ايه العذاب البطيء الى أقدر أختerce لبتروف ؟

(يصرخ فى اتجاه الكواليس) يا أبو برنيطة خوص !!

(يدخل أبو برنيطة خوص)

أبوس ايدك .. انت راجل مطلع .. اديننى نصيحة . أما
تحب تنتقم من واحد تعمل فيه ايه ؟

أبو برنيطة خوص : أولا أدور على نقطة الضعف الى فيه

ايفان ايفانوفيتش : وبعدين ؟

أبو برنيطة خوص : وبعدين أضرب على الوجيعة

ايفان ايفانوفيتش : رائع ! (للمشاهدين) أدور على نقطة ضعفه ..

حلازمه زى ظله .. عيني مش حتغفل عنه ولا ثانية • (مخاطبا

أبو برنيطة خوص) طيب عن اذنك أنا ماشى •

أبو برنيطة خوص : على فين ؟

ايفان ايفانوفيتش : على المشهد الثالث من الفصل الأول •

● المشهد الثالث

(باكر صباحا • حجرة مكتب بتروف • لا احد بعد • يدخل
ايفان وينظر حواليه باحثا عن مكان يختبئ فيه • يقبع تحت
مكتب السكرتير • يدخل بنروف • فى اللحظة التى يقرب
فيها من باب حجرة مكتبه يسمع صوت باب آخر يفتح •
يلتفت بتروف تجاه الصوت فيلمح رأس أنا نيكولايفنا خلف
فتحة الباب) •

بتروف : ادخل يا أمى •

أنا نيكولايفنا : أصلى يابنى مش عارفه ••

بتروف : مش عارفه ايه ؟

أنا نيكولايفنا : باين على جيت بدرى •• معلى حسنتى بره •

بتروف : وتستننى بره ليه •• مادام جيتى خلاص ادخل

أنا نيكولايفنا : ماتزعلش يا حبيبى من ست عجوزة زوى •• انت
باين عليك راجل قلبك طيب •• علشان شايفاك كده بتقول
يا أمى (تدخل) لكن أنا والحمد لله عارفة الأصول •• أنا
مش قلت لك حسنتى بره • عن اذنك على ماتبتدى شغللك ••
هى الأصول كده • الأصول أصول يا حبيبى أمال •• (تهم
بالخروج)

ايفان ايفانوفيتش : (من تحت المكتب) مفيش قايده • حيرجمها

بتروف : (يلحق بأنا نيكولايفنا) على فين ياستى •• أمال ••

رايحه فين ؟ (يسك بكوعها ويوقفها) باين عليكى جايه
بلدنا مبقالكيش كثير ٠٠ مش كده ؟

أنا نيكولايفنا : امبارح بالليل ٠٠ بلد مش بطالة ٠ والشوارع
كمان ماتقدرش بتول عليها حاجة ٠٠ ومش بس الشوارع
الى بيقتوا فيها الناس الكبار هى الى نضيفه ٠٠ لا دا حتى
الحوارى بتتكس وتترش وآخر نضافه ٠ وركبت الاوتوبيس
من المحطة « نذار الفلاح » دار نضيفه من بره ومن جوه ٠٠
تقولش يابنى هيه مترو موسكو الى تحت الارض ماناقصش
غير الشوية الذهب والمرمر ٠

بتروف : طيب اتفضللى يا أمى استريحى ٠

ايفان ايفانوفيتش : (من تحت المكتب) العجوزة عجبتنه ٠٠ ولو
انه برضه كان ممكن يعمل كده مع أى ست عجوزه ٠

أنا نيكولايفنا : متشكره ٠٠ حاقعد ٠٠ أصلى يعنى مش تعبانه ٠٠
يوم بليلته يابنى وأنا نايمه على رصيف محطة القطار ٠٠ وكل
الحكاية انى محتاجة امضاء واحده مافيش غيرها امضاء الرفيق
بتروف ٠

بتروف : طيب وليه مابعتيش الاوراق فى البوسته ؟

أنا نيكولايفنا : بتقول ايه ؟ فى البوسته ؟ انت بقالك كم سنه
بتشتغل هنا ؟

بتروف : ييجى عشر سنين ؟

أنا نيكولايفنا : وقبل كده كنت بتشتغل فين وصنعتك ايه ؟

بتروف : سمكرى فى مصنع

أنا نيكولايفنا : يبقى أحسن لك ترجع لشغلتك .. انت لا تنفع
سكرتير ولا مدير .. فإكر ان فيه سكرتير أول مايوصله
جواب من واحد لا راحت ولا جت اسمها وأنا نيكولايفنا
حيرج واخلد الجواب وداخل على المدير جرى عشان يمضيه ..
ليه يعنى ؟ تكونش فإكر المدير .. الرفيق بتروف قاعد فاضى
ماعندوش شغلة غير امضاء شوية الجوابات الى جايه من
البورسته ؟ يابنى الى ليه مصلحة لازم يجرى وراها برجليه
.. الناس لازم تمشى بالاصول .. أمال ايه .

ايفان ايفانوفيتش : (للمشاهدين من تحت المكتب) بقى الوليه
العجوزه دى هى الى جايه تعلم بتروف الاصول .
بتروف : طيب ورينى بس أوراقك

أنا نيكولايفنا : هوه انت يابنى سكرتير الرفيق بتروف ؟ .. احنا
فى بلدنا الرفيق كونستنتين سيرجيفيتش عنده
بتروف : (يوقع الأوراق) عنده ايه ؟

أنا نيكولايفنا : كونستنتين سيرجيفيتش الى هو مدير مديرك عنده
تلات « سكاتره » الأولانى خالص راجل بنضارات أول
مايشوفك يقول لك فوت علينا بعد أسبوع .. نظامه كده !
ياخد الأوراق يحطيا على اليمين .. يبص فيها تلات مرات
وبعدين يقول لك فوت علينا بعد أسبوع .. عمره مايقول
لواحد فوت بعد شهر والا خمسة أيام .. عامل لنفسه نظام
وبيحترمه .. وبعد أسبوع تروح للسكرتير التانى .. راجل
كده عليه القيمة .. عينيه زرق وشعره أكرت وخدوده حينط
منها الدم .. يقوم يقولك لو تكلمت مو علينا بعد أسبوعين ..
عمره مايقول لحد بعد شهر والا خمسة أيام هو نظامه كده
أسبوعين يعنى أسبوعين .. وبعد أسبوعين تروح للسكرتير

التالت ٠٠ وده راجل حواجه سود يقعد يبخلق فيك من فوق
لتحت وبعدين تفتكر حيقول لك ايه ؟ لا مش حتقدر تخمن .
لا مش ثلاثة أسابيع ٠٠ دا بقى يقعد يهرش فى مناخيره ٠٠
يهرش يهرش وبعدين يقولك تعالى بعد ثلاثة أيام ٠٠
معرفش جازي يكون متضايق منك ٠٠ لكن دى حاجات فى
القلب مايعرفهاش الا ربنا .

بتروف : (وقد فرغ من فحص الاوراق) طيب معلش .

انا نيكولايفنا : وانت نظامك يا حبيبى ٠٠ أجيلك بعد كام يوم ؟ ٠٠
الى يريحك .

ايفان ايفانوفيتش : (للمشاهدين من تحت المكتب) يظهر ان
قعدتى دى ماكانش لها لازمة .

بتروف : (يوقع) خلاص (يقدم لها الاوراق) تفضلى .

(يدخل السكرتير)

انا نيكولايفنا : (لا تمد يدها) أنا عاوزه امضاء الرفيق بتروف .
السكرتير : طيب ياسسى ماهو الرفيق بتروف هو الى مضى .

(لبتروف) صباح الخير سرجى كونسنتينوفيتش .

بتروف : صباح الخير .

انا نيكولايفنا : أنا يابنى متهيأ لى فيه حاجه كده غلط .

بتروف : غلط ايه ؟ ٠٠

انا نيكولايفنا : أصلك يعنى جاي قبل الميعاد ٠٠ والورق مادخلكش
مع السكرتير وانت كده حاجة تمخول من غير ماتقعد على

مكتبك زى الاصول رحت ماضى على الواقف .. أنا يا حبيبي
خايفه لتكون تسرعت وأسبب لك أذيه .

بتروف : لا اطمئننى ..

أنا نيكولايفنا : أنا الحمد لله عارفه الاصول كويس . والامضاء الى
تيجى كده على الماشى عمرها مابتنفع .. دا على رأى الى قال
فى العجلة الندامة .

بتروف : أنا كمان عارف الاصول

(تدخل ماريا أندريفنا)

ماريا : صباح الخير

بتروف : صباح الخير .. تلاقىك يا ماريا مانمتيش طول الليل ..
مالكيش حق تقلقى . ابنك بكره يخف ويبقى عال .

ماريا : (تجلس الى مكتبها وترفع غطاء الآلة الكاتبة) والمنوم الى
خدته منك مانفمش .. اشتريت كيسين ولا لهم أى مفعول

بتروف : امبارح أنا سألت البرفيسور بالتليفون وقال لى انه مقيش
أى خطورة .

ماريا : متشكرة قوى .. انت انسان طيب

(أنا نيكولايفنا تنصت الى الحديث بدهشة . جرس التليفون
يرن فى حجرة بتروف)

السكرتير : التليفون بيرن .

بتروف : أيوه سامع (يدخل الحجرة)

أنا نيكولايفنا : هو الرفيق بتروف راح فى ؟

ماريا : راح يرد على التليفون .

انا نيكولايفنا : حلمك .. حلمك .. هوه فيه حد يقدر يكلمه
دوغرى ؟ على طول كده ترفع السماعة وتقول له ازيك
ياسرجى كونستنتينوفيتش وكيت وكيت . والسكرتير واخذ
أوراقى بقاله شهرين ولحد دلوقتى ماقدمها لكش تأثر عليها .
وحاجات زى كده ؟ يعنى أى واحد يقدر يكلمه شخصيا ؟

ماريا : ودى فيها ايه ؟

انا نيكولايفنا : فيها ايه .. أما عجائب ياما انت قادر يارب .
ايفان ايفانوفيتش : (للمشاهدين من تحت المنضدة) قال ربنا قادر
قال .. ربنا ياخده بتروف دا .

(يدخل بتروف)

بتروف : (للسكرتير) ادينى شوية من الاوراق بتاعتك أنا النهاردة
فاضى شوية وعاوز أتسلى فيهم .. حنعملهم أنا وماريا
أندريفنا زى المرات اللى فاتت (يقترب من مكتب ماريا اندريفنا)
بعد اذنك (يحمل الآلة الكاتبة ويدخل مكتبه)
(ماريا تدخل وراءه)

(وهو يمر بأنا نيكولايفنا) أيوه يا أمى لك مصلحة ثانية ؟

انا نيكولايفنا : لا .. الحمد لله .. وحتى لو كانت لى مصلحة
مكنتش رنجعت لك تانى

بتروف : وايه زعلك منى ؟

انا نيكولايفنا : أنا أزعل منك . هو فين المدير اللى بيشتيل الماكينة
للسكرتيرة .. أنهو قانون والا أنى لايحه بتقول كده ..
اسمع يابنى .. انت لو قعدت هنا مدير أربعين سنه برضه

حتفضل زى ماكنت فى الورشة .. ربنا يحميك لشبابك
أنت فكرتنى بالمرحسوم ابنى .. هو راخر كان سمكرى
واستشهد فى الحرب .. فوتكم بعافيه .

(تخرج فتصطدم بالسائق فى مدخل الباب)

(يتراجع السائق ليفسح لها الطريق . ثم يدخل)

السائق : سرجى كونستنتينوفيتش !

بتروف : دقيقة واحدة !

(بتروف وماريا يدخلان حجرة المكتب . بتروف يعود)

أيوه ؟

السائق : زوجة ملاحظ الجراج بتولد .. تسمح لى أوصلها لمستشفى
الولادة ؟

ايفان ايفانوفيتش : (للمشاهدين من تحت المكتب) ودى عاوزه
اذن .

بتروف : ودى عاوزه اذن .. روح طبعا .

السائق : وبعدين يعنى أظن مافيش مانع أبقى أفوت على لوسيا
وأوصلها لغاية السوق . أصلى بشوفها كتير جاية من السوق
شايلة حاجات ثقيلة ومش قادرة تمشى .. صعبانة على
خالص . تسمح لى ؟

ايفان ايفانوفيتش : الجماعة السواقين دول أمرهم غريب .. بقى
داسؤال ! حيرفض ويقول له دى عربية حكومة وبنزين حكومة
واحنا مالناش حق نوصل معارفنا للسوق .. ضرورى حيقول
له كده .. أهه .. الله !! دا مبيجاوبش . وشه احمر ..
بقى كده !

استنى شويه .. بص لهم الاتنين كويس يا ايفان .. بص .

بتروف : (يصمت محرجا ثم يلتفت الى السكرتير) أنا حاحد شوية
الورق دول .

ايفان ايفانوفيتش : ايه ماجاوبش .. شايفين .. السكوت علامة
الرضا .. يعنى موافق .. جميل .. ممتاز . والله وقعت
يا بتروف .

السكرتير : اسمح لى أعبر لك عن اعجابنا جميعا بأفكارك الجديدة .
الى أفادتنا جميعا فى تنظيم العمل . وأنا واثق ان المؤسسات
كلها حقتدى بينا .. فى الواقع يارفيق بتروف انت قدوة
لنا بل ولرؤسائك أيضا . ياسلام لو فيه زيك ! ..

بتروف : (بخجل وغبطة) كفاية .. كفايه !

ايفان ايفانوفيتش : شايفين مزقطط ازاي ؟ .. بس أديك دلوقتى
بقيت هناه .. (يضم قبضته بقوة)

السائق : طيب أنا حوصل لوسيا للسوق بالمرة وخرج حالا .

ايفان ايفانوفيتش : ومستعجل ليه ؟ . وصلها يا حبيبى .. وصلها
كمان للكوافير والخياطة

بتروف : أنا بالليل مش عاوز العربية .. حاروح ماشى .

(يدخل حجرة مكتبه)

(السائق ينصرف)

السكرتير : جرا له ايه ؟ . ماله متضايق ؟

ايفان ايفانوفيتش : يتفلق .. أنا حتنطط من الفرح !

(السكرتير يأخذ بعض الاوراق ويدخل مكتب بتروف ...)

ايفان ايفانوفيتش يخرج من تحت المكتب ويتلصص النظر
حواليه ٠٠ يتمشى ٠٠ يقطع ركبته ٠٠ ينفذ الغبار عن
يديه ٠٠ يقهقه فرحا ٠٠ أبو برنيطة خوص وأبو كسكته
يدخلان)

أبو كسكته : حصل ايه يا ايفان .

ايفان ايفانوفيتش : وجدتها ! . وجدتها ! مش حينفد من ايدى .
(يقهقه بشماته)

أبو كسكته : (يهمس فى اذن أبو برنيطة خوص) لو بس أعرف
ايه الى بيدبره لبتروف ٠٠ الواحد مايصحش أبدا يسكت
وهو شايف انسان بيدبر مقلب لانسان تانى ٠٠ حاول كده
تعرف بيدبر ايه علشان نحذر بتروف فى الوقت المناسب .

أبو برنيطة خوص : أنا ؟ حاول انت .

أبو كسكته : انت محتمل جدا انه يصارك .

أبو برنيطة خوص : واشمعنى أنا الى حيصارحنى هو أنا الأجندة
الى نيسجل فيها أفكاره .

أبو كسكته : انتوا بينكم وبين بعض تفاهم .

أبو برنيطة خوص : ولو ! ماتضيعش وقتك ؟ بتروف حيموت يعنى
حيموت مافيش حد حيقدر ينقذه ! حيموت ازاي ٠٠ دلوقتى
تشوف بعد الاستراحة ٠٠ فى الفصل التانى ٠٠ هاهها ٠٠
يقهقه بطريقة استفزازية)

سستار

الفصل الثانی

المشهد الرابع

بتروف يعبر • أبو كسكته يحاول اللحاق به

أبو كسكته : رفيق بتروف !

بتروف : (يتوقف) حصل ايه ؟

أبو كسكته : هو ناوى يقضى عليك •• حيقضى عليك المشهد ده •

بتروف : على أنا ؟ فى المشهد ده ؟ • هو مين ؟

أبو كسكته : ايفان ايفانوفيتش

بتروف : ازاي ؟

أبو كسكته : ازاي ما أعرفش

(يدخل أبو برنيطة خوص)

أبو برنيطة خوص : (للمشاهدين) اسمحوا لى أحييكم يا حضرات
السادة المحترمين •

أبو كسكته : (مخاطباً بتروف) اذا ما كنتش مصدقنى اسأله هو ••

أبو برنيطة خوص : أنا ما أعرفش أى شىء •• ثم انى مش فاهم
انتوا بتتكلموا عن ايه •• وما أحبش أتبلى على حد ••

أبو كسكته : بقى ايفان ايفانوفيتش مقالش قدامك انه ناوى يقضى
على الرفيق بتروف ؟

أبو برنيطة خوص : (وكأنه لم يسمع السؤال المطروح عليه يخاطب

بتروف (النهارده بالليل أنا حلقي محاضرة فى القاعة
الصغرى فى المتحف .. ويبقى شرف عظيم لى لو شرفتني
بحضورك .

بتروف : وموضوع المحاضرة ايه ؟

أبو برنيطه خوص : هل وجود بطل ايجابى ضرورى فى العمل
الفنى ؟

بتروف : وايه رأيك فى القضية دى ؟

أبو برنيطه خوص : لا .. طبعا مش ضرورى . مش ضرورى على
الاطلاق .

أبو كسكته : الله .. انت مش كنت بتقول العكس « لابد من وجود
بطل ايجابى » .

أبو برنيطه خوص : صحيح ؟ مش فاكرك .. (يتوجه الى المشاهدين)
ثم ايه معنى كلمة « العكس » يا حضرات الافاضل .. نشوف
مثلا الورقة مين يعرف وشها من ضهرها ؟ هل احنا منقدرش
نكتب على الوشين أفكار متناقضة مع بعضها .. ايه ذنب
الورقة ؟ فما بالكم بالانسان .. هل هو ورقة ؟

أبو كسكته : انت فعلا زى الورقة .. (مخاطبا بتروف) رايح
فين !

بتروف : رايح الشغل .

أبو كسكته : خد بالك .. أنا بحذرك من ايفان ايفانوفيتش ..
وعلى العموم اذا حصلت لك حاجة ابقى انده لى (يدفع أبو
برنيطه خوص) يللا بينا .

أبو برنيطة خوص : امتي بقي حتبطل الحركات دي .. انت مش عاوز تتعلمن أبدا ؟

أبو كسكتة : (يواصل دفع أبو برنيطة خوص) يللا بقولك ..
يللا بقولك .. الله .. المشهد حبيبتدي .

(بتروف يدخل حجرة مكتبه .. يبدو شارد الذهن ..
الحجرة خاوية لا أحد بها .. على جدران الحجرة براويز كبيرة
ممتلئة بداخلها صور مكبرة لبتروف .. عدد البراويز هائل
بحيث يخفي الجدران .. بتروف يدخل مكتبه دون أن يلاحظ
ذلك كله .. وراء مكتبه أيضا برواز كبير .. بتروف يصاب
بدهشة بالغة حين تقع عيناه على الصور .. يقترب منها
وينظر اليها بتمعن)

بتروف : الله .. دي صوري أنا .. مين اللي عملها ؟ مين اللي قال
لهم يعملوا الحاجات دي ؟ .. أما حنة صورة .. الواحد زى
مايكون شايف نفسه فى مرآة مقعرة . لكن ايه اللي علقها
هنا .. مانيش فاهم حاجة أبدا . (يخرج الى حجرة
الانتظار فيلتقى بايفان ايفانوفيتش داخلا) شايف ؟

ايفان ايفانوفيتش : شايف ايه ؟

بتروف : ايه مش شايف ؟

ايفان ايفانوفيتش : آه .. جنان ! رافاييل ذاته مايقدرش يرسم
أحسن من كده !

بتروف : (يلاحظ الصور المعلقة فى حجرة الانتظار) الله ..
الله .. الله وهنا كمان .. دول كام صورة !

ايفان ايفانوفيتش : كأنك ماخدتش بالك منهم .. أنا عاوزك ..

هو انت عندك وقت عشان تبص على الجدران • جوهر القضية
ان واحد فى مكانتك مشغول براحة البلد كلها مش معقول
يفضى يتفرج على الجدران •

بتروف : مين اللى علقها هنا ؟

ايفان ايفانوفيتش : أنا •

بتروف : انت ؟

ايفان ايفانوفيتش : طبعا مش بايدي •• لكن يعنى أنا صاحب
الفكرة والمشرف على تنفيذها • (ينظر الى أحد البراويز)
بيتهيا لى انه معوج شوية •• ملووح سنة ناحية الشمال •
(ايفان ايفانوفيتش يدخل حجرة المكتب ويتبعه بتروف)

بتروف : ايه بس •• عاوز ايه ؟

ايفان ايفانوفيتش : (يصحح وضع البرواز •• يتراجع بضغ خطوات
ثم ينظر الى الصورة) دلوقتى عال •• تعرف مين اللى رسم
الصور دى •• ياسلام لو تعرف الشخصيات اللى بيرسمها
الفنان دا •

بتروف : أيوه •• لكن ايه لزوم ده كله ؟

ايفان ايفانوفيتش : سرجى كونستنتينوفيتش •• لو سمحت
اتفضل استريح و ••

بتروف : لكن انت ليه ••

ايفان ايفانوفيتش : اتفضل استريح •• اسمح لى بعشر دقائق من
وقتك الثمين •

بتروف : انت بتتكلم بطريقة عجيبة جدا . ايفان ايفانوفيتش .
انت جرى لك حاجة كده . مش مفهومة أبدا .

ايفان ايفانوفيتش : (بجدية) سرجى كونستنتينوفيتش اسمح لى
نتكلم بصفتنا رفيقين نسير معا على طريق واحد الى هدف واحد
مشرق . جوهر القضية (بتروف يهم بقول شىء لكن ايفان
يسكت بهركة من يده) ماتقاطعنيش أرجوك . أنا عارف انك
مش من أنصار الكلمات البراقة زى الهدف المشرق . المناضل
الغدا . العزة المشروعة . لكن الجمل دى زى العجل من غيرها
الكلام مش ممكن يمشى . نركب أربعة منها تلاقى الكلام بيتحرك
طبيعى والأفكار بتتبدلور ببساطة . وليه انت
ما تستعملش الكلمات دى . وخصوصا ان الناس كلهم
بيستعملوها . دى زى ما تقول بقت ملكية عامة .

بتروف . ايفان ايفانوفيتش . سيبنا من العجل بتاعك وقول كده
دوغرى . انت ليه أمرت بتعليق البروايز دى ؟

ايفانو ايفانوفيتش : كل ما هناك انى أديت الواجب الى كان لازم
أعمله من زمان وأرجوك تسامحنى على تقصيرى .

بتروف : واجب ايه . أنا أرجوك ترد باختصار ووضوح . ليه
أمرت بتعليق البراوين دى ؟

ايفان ايفانوفيتش : دى أول مرة أشوفك فيها متنرفز . لكن
تعرف ان النرفزة لايقه عليك خالص . أنا راجل مبدئى
وبصراحة جوهر القضية يا رفيق بتروف أن المدينة كلها بل
الأقليم كله بيحبك جدا . الشيوخ بيعتبروك ابنهم والشبان
يعتبروك اخوهم والأطفال بيعتبروك أبوهم بالضبط .
كلهم بيعحبوك بصدق وإخلاص . ودا شعور طبيعى لأنك

انت بتحب كل المواطنين .. الشعب كله والاقليم كله بيتقدم
ويزدهر ويتألق بفضلك انت .. الواقع انك انت اذا فكرنا
في جوهر القضية ..

بتروف : (متحرجا وسعيدا في نفس الوقت بكلمات ايفان
ايفانوفيتش) من فضلك .

ايفان ايفانوفيتش : (بلهجة مختلفة) لكن العملة ليها وش تانى !
بتروف : ايه هو ؟

ايفان ايفانوفيتش : الحب أى نعم شىء جميل .. لكن .. الهيبة !
هل أنت لك هيبة ؟ صحيح أعمالك البلد كلها بتقابلها بالتأييد
الشامل والاعجاب .. لكن تفتكر ان لك هيبة كافية ..
والا حتى هيبة فى نظر سكرتيرة مكتبك والا الفراشة ناتيانا
• أنا بسألك .. جاوبنى •

بتروف : معرفش .. عمرى ما فكرت فى كده ..
ايفان ايفانوفيتش : لكن لازم من هنا وجاى تفكر •
بتروف : هيبة !! والله ما أعرف .. يمكن ماليش ..
ايفان ايفانوفيتش : مافيش يمكن .. فعلا مالكش هيبة • لكن
لازم تتوجد .. ثم المسألة مش بس فى الهيبة .. كمان لازم
يكون لك جو مخصوص .. هالة .. تفتكر القائد اللي
مالوش هالة حواليه يقدر يقوم بأعباء المسئوليات الخطيرة الملقاة
على أكتافه .. أنا بسألك .. جاوبنى .. يقدر والا لا •

بتروف : يمكن لا •

ايفان ايفانوفيتش : مافيش يمكن .. يقدر والا لا ؟

بتروف : لا ما يقدرش •

ايفان ايفانوفيتش : (عاجزا عن اخفاء فرحته) الحمد لله !

بتروف : بتقول ايه ؟

ايفان ايفانوفيتش : (يستعيد سيطرته على مشاعره) بقول انك لازم فى اقرب وقت تخلق لنفسك هيبة وهالة .. دى مش قضية شخصية .. دى قضية عامة .. تهم البلد كلها .. اهو دا يارفيق بتروف السبب فى تعليق صورتك هنا .

بتروف : عجيبة !

ايفان ايفانوفيتش : ايه العجيب ؟ هو انا يعنى مش عارف اقنعك !
بتروف : لا .. لا .. مش دا قصدى . اصلهم يدوب قالوا لى انك ناوى تقضى على .

ايفان ايفانوفيتش : انا ؟ ناوى اقضى عليك ؟ انت صدقت ؟ مين الى قال لك ؟ مين الوجد الموقعاتى ده ؟ مين السافل ده ؟ آه عرفته .. لازم ابو كسكته .. مش عارف انت لاحظت والا لا ان الراجل ده فيه رواسب كبيرة من السيكلوجية البورجوازية .

(يدق جرس التليفون فيهم بتروف برفع السماعة ، لكن ايفان يأخذها منه)

ايفان ايفانوفيتش : أيوه موجود .. أيوه اتصل بالسكرتير . نمره السكرتير ؟ اسأل الاستعلامات .

(يضع السماعة)

بتروف : ليه عملت كده ؟

ايفان ايفانوفيتش : حنرجع تانى من الاول ! دا شىء مش معقول .

هو كل من هب ودب بمجرد ماتقوم فى دغه انه يتصل بيك
•• يروح ضارب النمرة فيلاقيك علطول على الخط • جوهر
القضية يارفيق بتروف انك صاحب مسئوليات ضخمة ••
انك مش فاضى •

بتروف : لكن ليه ماجاوبش مادام عندى وقت ؟ لما يكون مشغول
مايرفعش السماعة •• ودى طبعا حالات نادرة جدا • يعنى
دلوقت مثلا كان ممكن أرفع السماعة وأرد على الشخص الى
عاورنى •

ايفان ايفانوفيتش : يظهر انك نسيت مسألة الهيبة •
بتروف : دى مسألة صعبة •• صعبة جدا •

ايفان ايفانوفيتش : فى الأول بس •• بعدين حتتعود •• كل شىء
فى أوله صعب حتى ربط الصواميل •• فما بالك بتبرير
الثقة •

(ماريا والسكرتير يدخلان الحجرة ويشرعان فى مباشرة
عملهما ويعقبها أبو برنيطة خوص برنقة مصور •• يدخلان
حجرة بتروف)

أبو برنيطة خوص : نحن هنا !

ايفان ايفانوفيتش : (مشيرا الى النحات) النحات العظيم بروف
جايز متعرفهوش شخصيا •• لكن طبعا سمعت عنه • فى
الحقيقة هو من أعظم النحاتين •• وأعماله كلها دائما تحظى
بالاعجاب والتقدير العام •

بتروف : فرصة سعيدة •

(يتصافحان)

النحات : أنا حمل لك تمثال مدهش .

بتروف : لى أنا ؟ ليه ؟

(النحات ينظر بدهشة الى ايفان ايفانوفيتش)

ايفان ايفانوفيتش : (هامسا الى بتروف) لزوم الهالة .. للنحات
من فضلك شوف شغلك .

بتروف : دلوقتى ؟ مش أحسن فى وقت تانى .. بعد الشغل ؟

النحات : ما تقلقش نفسك ..

(المصور يعد الكاميرا والFLASH)

(للمصور) تقدر تبتدى .

المصور : (لبتروف) لو سمحت من فضلك .. راسك كده شوية
على اليمين .. أيوه .. كمان شوية .. بس .. عال خليك
كده بقه دقيقة من فضلك . (يقدم الفلاش الى أبو برنيطة
خوص) امسك لو سمحت .

النحات : (لبتروف) ماتبتسمش .. راسك لفوق شوية .. كثر
سنه .. ادى نفسك مظهر الهيبة والعظمة ..

بتروف : ما أقدرش ..

ايفان ايفانوفيتش : ماتتعبوش الرفيق بتروف .. هيبة ايه وعظمة
ايه ؟ الحاجات دى ابقوا اعملوها انتوا بعدين .

المصور : ما تتحركش (يعطى اشارة لأبو برنيطة خوص فيشعل
الFLASH) خلاص !

النحات : كمان صورة للبروفيل .

(المصور يلتقط صورة)

ودلوقتى بقى نأخذ أهم بوز (لبتروف) أدينا ظهرك من فضلك
(يدير ظهر بتروف للكاميرا) حنصورك من قفاك .

بتروف : وتهم مين صورة قفاى ؟

النحات : تهمنى أنا . . كل الصور دى حاجتها عشان أعمل
تمثال .

بتروف : مش فاهم ايه لزوم الصور عشان تعملوا تمثال لشخص
حتى يقدر يقعد قدام المثال فى أى وضع .

أبو برنيطة خوص : اسمع لى أفهمك وأعتقد ان القضية تههم حضرات
المشاهدين أيضا . . (يتوجه الى المشاهدين) حضرات المشاهدين
المحترمين : ان التطور التكنولوجى يحدث تأثيرا متبادلا
ومختلف المستويات على الأساس المادى كما على كافة ظواهر
البناء الفوقى للمجتمع بما فى ذلك الفن . ونظرا الى أن
التطور التكنولوجى لدى الاغريق والهنود فى العصور السحيقة
لم يكن قد بلغ المستوى الذى يسمح باختراع آلة التصوير
فقد كان النحاتون والفنانون مضطرين الى الاعتماد على
الموديل الحى أو على الذاكرة فى خلق أعمالهم الابداعية . أما
فى عصرنا . . عصر الذرة والتصوير فلا ينبغى أبدا أن يلجأ
النحاتون والفنانون الى هذا الأسلوب البدائى العتيق الذى
يرجع الى ما قبل المرحلة الرأسمالية . لماذا ؟ أولا : لأن
الفنان لا يستطيع أن يشغل الموديل عن مهام منصبه الحكومى ،
ولا يستطيع أن يرغمه على الجلوس دون حركة لعدة ساعات
متواصلة . وثانيا : لانه حتى ولو وافق الموديل المحترم فهناك
مشكلة ثانية وهى أن معظم كبار النحاتين فى بلادنا يعملون

على رأس مجموعات كبيرة من النحاتين وليس من المعقول أن
تأتى مثل هذه المجموعة الكبيرة الى الموديل المحترم .

بتروف : لكن أنا مش فاكر قرئت فين ان النحاتين فى العصر
الاغريقى كان ليهم مساعدين .

أبو بريطة خوص : هذا صحيح تماما . . لكن . . لاتنسوا يحضرات
المشاهدين أن النحاتين الاغريقين كانوا يقومون بالدور
الرئيسى ثم يتركون لمساعدتهم الأعمال الثانوية .

(يدخل أبو كسكتة)

أبو كسكتة : لكن دلوقتى المساعدين هم الى بيادوا الدور الرئيسى
والأدوار الثانوية . . والفنان الى زى ده أصبح متفرغ لأخذ
الطلبات واستلام النقود ، وطبعاً التوقيع على المقالات الخاصة
بالنقد الفنى الى يكتبها غيره . . . صباح الخير يارفيق . .

بتروف : شايف الى عاملينه معاً ؟

أبو كسكتة : شايف .

النحات : ما تقدرش حضرتك تفضى نفسك حوالى نص ساعة بعد
عشرة أيام وتفوت على فى الفابريكة . . قصدى الأستديو .

بتروف : طيب . . طيب . . أبقى أحاول مرة بعد الشغل .

(المصور والنحات يخرجان)

(بتروف ينظر الى صورته) اذن البورتريه دا كمان عملوه
من الصور . . مافيش شك لانى ماقعدتش قدام أى رسام . .
لكن عملوه من آنى صورة ؟ (يقترب ويحملق فى صورته)
دا فيه شبه منى ؟

ايفان ايفانوفيتش : الله فيه شبه . . يارفيق بتروف احنا اذا تعمقنا
فى جوهر القضية نجد أن البورتريه دا يعتبر من أعظم الأعمال
الفنية ايعاء وسموا والهاما .

أبو برنيطة خوص : دى كأنها صورتك فى مرآة .

ايفان ايفانوفيتش : (يتجه ناحية باب الحجرة وينادى السكرتير
وماريا) تعالوا دقيقتين لو سمحتم . .
(السكرتير وماريا يدخلان)

ايه رأيكم . . صور الرفيق بتروف دى شبهه والا لا ؟

السكرتير : سبحان الخالق . . أنا الحقيقة فرحت جدا انك علقنت
الصورة دى فوق روسنا وقدام عينيها .

ماريا : على العموم احنا من قبل تعليق الصور كنا بنحترمك . .
فيعنى مافيش حاجة اتغيرت .

بتروف : أنا مش بسألك عن ال . . أنا بسألك الصور دى تشبهنى
والا لا ؟

ماريا : مش عارفة أقول لك ايه .

أبو كسكتة : اذا كنت عاوز رأيى يارفيق بتروف . . .

ايفان ايفانوفيتش : رأيك مايهمش حد .

أبو كسكتة : يتهى لى يارفيق بتروف انك فى الصورة أطول بكثير
من حقيقتك .

أبو برنيطة خوص : قفشت لك قفشة يا شاطر ؟ أطول . . أقصر

. . ثم ان الفنان الحقيقى لازم يطلع من مستنقع الطبيعة . .

فنان ايه دا اللى مايعرفش يخلي المدير القصير يبان طويل ؟

أبو كسكتة : وكمآن يا رفيق بتروف أنت صدرك فى الحقيقة كنز
لكن الصورة مخلية صدرك واسع خالص .. ثم ان وشك
مليان تجاعيد مهباش باينة فى الصورة .. وأهم من دا كله
ان وشك فى الحقيقة سمح وابتسامتك رقيقة .. لكن بص
شوف عملاك ايه .. واحد من الجبابرة !

(ايفان يشير الى السكوتر وماريا بالخروج .. يخرجان
ويغلق خلفهما الباب)

ايفان ايفانوفيتش : (يتوجه الى أبو كسكتة) ايه قلة الأدب دى ؟
بتروف : (يدقق النظر فى صورته فيلاحظ وساما على صدره)
طيب ودا ايه ؟

ايفان ايفانوفيتش : وسام .

بتروف : لكن أنا ماعنديش أوسمة .. ماعنديش غير ميداليات
خدتها فى الجبهة .. أوسمة ماعنديش خالص .

ايفان ايفانوفيتش : ودى غلطة مين ؟

بتروف : قصدك ايه ؟

ايفان ايفانوفيتش : غلطة مين انك ماخدتش أوسمة ؟ غلطتى ..
غلطتك ولا غلطة حد تانى ؟

أبو برنيطة خوص : ايفان ايفانوفيتش عاوز يقول ان الواقع
ماهواش انك ماخدتش وسام .. الواقع انك لازم كان يكون
عندك وسام . (للمشاهدين) : ان الفن يحضرات المشاهدين
يعبر عن الواقع الحقيقى وليس عن الواقع الشكلى . من زاوية
الواقعية فى الفن .. هل يعتبر الفنان مخطئا اذا وضع على صدر

السيد بتروف وساما ليس موجودا من الناحية الشكلية ..
ان الفنان بالتأكيد لم يخطئ .. ان الرؤية الفنية تختلف
كثيرا عن الرؤية العينية .

بتروف : مفهوم .. مفهوم .. احنا اذا نظرنا الى جوهر القضية ..
الله ايفان انا ابتديت اتكلم زيك ! طيب فى الحسالة دى بقى
يستحسن رسم الوسام بشكل واضح .. لان الواحد
مايقدرش يشوفه الا لو قرب قوى من الصورة .

ايفان ايفانوفيتش : عندك حق .. انا لازم اصلح الغلطة دى فورا .
(يقفز على المقعد وياخذ علبة الألوان والفرشاة ثم يرسم
وساما ضخما مكان الوسام الصغير الذى كان يرى بصعوبة)
كده كويس ؟

بتروف : أيوه كده .. أهو دلوقتى يشبه وسام حقيقى .

ايفان ايفانوفيتش : لكن وسام كده فردانى مش لايق .. (يرسم
وساما ثانيا) هيه .. دلوقتى ؟

بتروف : انت اتاريك فنان عظيم يا ايفان .. احنا لو بصينا لجوهر
القضية نجد ان رسم وسام بالسرعة دى يعتبر فى حد ذاته
انتصارا كبيرا .

ايفان ايفانوفيتش : لازم نعلق أوسمة على بقية الصور .. دقيقة
واحدة .

(ايفان يدخل برفقة أبو برنيطة خوص الى حجرة الانتظار ثم
يشرعان فى رسم الأوسمة على صور بتروف . ماريا تجلس
الى مكتبها مكتئبة وقد أسندت رأسها بيديها .. تنهض وتتجه
الى مكتب بتروف لكنها تغير رأيها وتعود الى وضعها السابق .

فى هذه اللحظة يرى بتروف محدقا فى صورته .. ىرن جرس
التليفون)

بتروف : (يرفع السماعة) مين ؟ الرفيق بتروف ؟ اتصل بالسكترير
اتصل بالسكترارية بقول لك . اسأل الاستعلامات ..
لا .. استنى شوية ٣١٣٢٦ (يضع السماعة) أووه ..
حاجة تفلق .. راسى بتلف لف . جوهر القضية . (يتجول
فى الغرفة . يقف أمام صورته . يطيل النظر إليها . تلوح
على وجهه أسارير الرضا . يتوجه الى أبو كسكتة متسائلا)
ايه الكلام اللى قلته لى النهاردة دا ؟

أبو كسكتة : قلت لك ايه ؟

بتروف : قلت لى ان ايفان ناوى يقضى على ! غرضك ايه من الكلام
ده ؟ عاوز تمثل دور أشرف وأطيب انسان ؟ عاوز توقع بينى
وبين أعز أصدقائى ؟ .. ايفان مناضل ثورى حق ينطلق على
طريق الانتصارات الباهرة والانجازات الجبارة نحو أهدافنا
المشتركة السامية .. ايفان عمل فيك ايه ؟ بتكرهه ليه ؟

أبو كسكتة : مادام بتتهمنى ببقى الكلام مالوش داعى .. ما انتش
حتصدقنى . راسك خلاص لقت . لكن على كل حال .. خد
بالك من نفسك واذا اتزنقت قوى ابقى انده لى .. أنا برضه
مش حتخلي عنك .

بتروف : لسه ماعملتش حاجة وخلاص هلكت من التعب .. ولا كآنى
باشتغل فى الفاعل من عشر ساعات . (يصرخ) أندريه ..
أندريه !

السكترير : (يساعد ايفان فى اتمام رسم الأوسمة) حضرتك بتنادى
على ؟

بتروف : (دون ان يبدى حراكا من على مكتبه مع تصنع الصرامة)
طبعا بنادى عليك

ايفان : (يقول للسكرتير بسرور) اجرى لحسن المدير مزاجه باين
مش رايق .. يا سلام على ظرفه لما يبقى زعلان .

بتروف : (بحدة) أندريه !

(السكرتير يدخل مسرعا)

السكرتير : أوامر حضرتك ؟

بتروف : أولا لازم تركبوا على مكتبى جرس يرن فى أودة الانتظار
.. أنا مش معقول أقعد أنبح حسى كل ما أندده لك .

السكرتير : (مغتبطا بالتغيير الذى طرأ على بتروف) حاضر ..
بكره حيكون راكب .

بتروف : بكره ازاى .. لازم يركب النهاردة .. فى فسحة الغذاء
لازم الجرس يركب ، وثانيا سجل التعليمات دى فى مذكرتك
وبلغها لغيرك .. (السكرتير يستعد للكتابة) جرس واحد
تيجى انت ، جرسين تيجى التيبست ، ثلاثة تيجى الفراشة .

السكرتير : حاضر .

(ايفان يسترق السمع منتشيا ، يدخل حجرة بتروف بصحبة
أبو برنيطة خوص)

ايفان ايفانوفيتش : قبل كل شىء اسمح لى ألفت نظرك يا رفيق
بتروف لحاجة صغيرة .

بتروف : اتكلم :

ايفان ايفانوفيتش : (مشيرا الى الباب) دا ايه ؟
بتروف : (بحيرة شديدة) ايه . . باب !
أبو برنيطة خوص : دا ولا أبواب لوكاندات الدرجة الثانية .
ايفان ايفانوفيتش : أنا شايف ان الباب دا لازم يتغير بكرة على أقصى
تقدير .

بتروف : ماله الباب ؟
ايفان ايفانوفيتش : قبل كل شيء . . بابك لازم يكون دوبل ومتغطى
بالجلد . . لازم يكون محكم مايفوتش أى صوت من المكتب
لأودة الانتظار ولا من أودة الانتظار للمكتب لازم يبقى باب
فخم يليق بمقام مدير له هالة وهيبة .

بتروف : (للسكرتير) سجل التعليمات دى .
السكرتير : حاضر .

بتروف : ابعت لى التيبست .
السكرتير : حالا .

(ايفان وأبو برنيطة خوص يخرجان الى حجرة الانتظار ،
يتبعهما السكرتير الذى يتوقف عند عتبة الباب)

(بنفس اللهجة والأسلوب المعتاد) أبعت لك شوية أوراق ؟

بتروف : أوراق ايه ؟

السكرتير : قصدى يعنى . . لو عندك وقت . .

بتروف : انت ايه . . جرى لعقلك حاجة . . قبل كل شيء لازم تتعلم
ازاى تؤدى واجبك بنفسك . . دى الطريقة الوحيدة لتنظيم
العمل والقضاء على الفوضى ودفع عجلة الانتاج . .

السكرتير : متأسف يا حضرة المدير .. (يخرج من الحجرة وقد طغت عليه السعادة) أهو دلوقتى بس بقى مدير بحق وحقيقى ..

ماريا : وقبل كده ماكانش مدير حقيقى ؟

السكرتير : كانت فيه حاجة ناقصاه .. الهيبة .. هالة المدير .
خليه يبان مبوز .. خليه يكلمنى من غير مايبص لى . أنا مش عاوزه يساعدننى فى شغلى .. هو لازم يعرف مكانته هو الرئيس وأنا المرءوس .. وبكره أبقى أنا ريس ويبقى لى مرءوسين .. وأبقى أعاملهم بنفس الطريقة .. آه آمال (متداركا) يا خبر .. دا عاوزك حالا . بسرعة لحسن النهارده باين عليه آخر عكنته (يفرك يديه) .

(ماريا تحمل الآلة الكاتبة وتدخل مكتب بتروف السكرتير يقترب من ايفان ايفانوفيتش الذى يواصل رسم الأوسمة على صور بتروف ، أبو برنيطة خوص يحمل الألوان)

ماريا : (تخطو بضعة خطوات داخل مكتب بتروف ثم تتوقف) انت ندهت لى ؟

بتروف : (يرفع رأسه من على الورق الموضوع أمامه) ايه ... ايوه ..

(ماريا تسير بخطوات بطيئة تجاه منضدة فى حجرة بتروف . بتروف يراها تتعثر فى مشيتها فيهم بحركة لا ارادية ليحمل عنها الآلة الكاتبة - كمادته - لكنه يستدرك فيقاوم رغبتة)

ماريا : أخط الماكينة فى مكان كل مرة ؟

بتروف : (يقهر تردده فيهرع الى ماريا ويحمل عنها الآلة الكاتبة)
لا مؤاخذه (يضع الآلة على المنضدة) .

ماريا : (تتنهد بارتياح) هاه . . (بنبرة فرح) متشكرة قوى !
(ايفان ايفانوفيتش يراقب الموقف من خلال الباب المفتوح . .
يقع مغشيا عليه بين يدي السكرتير وأبو برنيطة خوص)

ايفان : يادى اللعنة . . يظهر انه حيدوخنى .

● المشهد الخامس

(كافيتريا المؤسسة • ماريا ، وتاتيانا ، والسائق ، وبعض
العاملين الآخرين يجلسون الى الموائد • أبو كسكتة
وأبو برنيطة خوص يقفان في المقدمة)

أبو برنيطة خوص : ماهواش جاى !

أبو كسكتة : مايجيش ازاي • دا كل يوم بيغطر هنا مع الناس •

أبو برنيطة خوص : كلمة « كل يوم » تتعارض مع الديالكتيك ..
ايه معنى « كل يوم » •

أبو كسكتة : مسكين الديالكتيك !

(يدخل ايفان ايفانوفيتش)

أبو برنيطة خوص : ايفان ايفانوفيتش !

ايفان ايفانوفيتش : (وكأنه لا يرى أبو كسكتة) يحيى أبو برنيطة
خوص وحده •

أبو كسكتة : وأنا ؟ مش عاوز تسلم على ؟

ايفان ايفانوفيتش : أنا ما أعرفكش .. ومش عاوز أعرفك •

أبو كسكتة : على العموم معرفتك ماتشرفش (يغادر مقعده ليجلس
على مائدة ماريا)

أبو برنيطة خوص : هيه .. تفكر حبيجي ؟

ايفان ايفانوفيتش : فى الحقيقة التنبؤ صعب لكن من قبيل الحيلة
أنا قررت أوصل ميدان المعركة قبله .

(يدخل السكرتير وينظر حواليه بحثا عن مكان يجلس فيه)

تاتيانا : اتفضل استريح .

السكرتير : شكرا (يترك منضدة تاتيانا ويجلس بجوار السائق)

تاتيانا : شايفين : يعنى قبل كدة ماكانش بينقى المكان اللى يقعد
فيه . اليومين دول بقى يعتبر أن مكانته ماتسمحلوش يقعد
معانا .. اتغر خالص !

موظف : يعنى هى العظمة واخداه لوحده .. دى العظماء اليومين دول
بقوا بالكوم .

ماريا : (لأبو كسكتة) انت طبعا فاهم أخينا دا بينبسط على مين ..
لكن صحيح هو ليه بقى كده .. حاجة تغم !

أبو برنيطة خوص : (يتقدم من الموظف) اسمح لى أسألك انت
بتنبط على مين ؟

الموظف : أنا ؟ لا أبدا .. أنا ماليش دعوة .. دا أنا قصدى ان أنا
يعنى اللى سايق العظمة شوية .. أنا مالى ومال الادارة ؟

أبو برنيطة خوص : دى تبقى حاجة تانية ! (يعود الى ايفان
ايفانوفيتش)

(تدخل لوسيا .. تمر بمحاذاة منضدة السائق والسكرتير)

السكرتير : لوسيا ! اتفضلى هنا .. (يشير الى منضدته) .

لوسيا : متشكرة .. أنا حقعد هناك .

السائق : اذا كنت عاوزه اى حاجة .. امرى .. أفوت عليكى
بالعربية .

لوسيا : لا .. متشكرة . (تجلس الى مائدة ماريا) هو لسه
مجاش ؟

ماريا : تفتكرى انه حييجى ؟

لوسيا : مايجيش ليه . أهوه .. جه أهه !

ايفان ايفانوفيتش : (بحسرة) جه !

ماريا : (بغبطة) جه !

الموظف : (برهبة) جه !

السكرتير : (بدهشة) جه !

(يدخل بتروف متشامخا . دون أن ينظر الى أحد يتخذ
مجلسه الى مائدة لا يجلس اليها أحد)

بتروف : لانشو وشاى بليمون

الجرسونة : تحب تاخذ بسكويت ؟

بتروف : لا .

لوسيا : (تقترب من مائدة بتروف) .. صباح الخير .

بتروف : (تتغير تعبيرات وجهه وتلوح ابتسامة عريضة على

محياء) صباح الخير يا لوسيا .. اقعدى . انت مستخبية

ليه .. ولا بتيجى ولا بتتصلى بالتليفون .. ايه نسيتينى

خالص ؟

لوسيا : طيب وانت ؟ مالك كده داخل زى الى بيمشوا وهم نايمين

.. ومقعدتش ليه معانا زى كل يوم ؟ ثم ايه حكاية ساشا

السواق الى مستلمنى فى الرايحة وفى الجاية أوصلك بالعربية

السوق .. أروحك البيت ..

بتروف : وفيها ايه .. عمل خير .
لوسيا : عمل ايه ؟ خير ايه انه يوديني السوق بعربية الحكومة ؟
ايه اللي جرى لك يا حبيبي .. فوق لنفسك .. جرى لك
ايه ؟

بتروف : فعلا .. أنا مش عارف ايه اللي جرى لي .. أنا لازم عيان!
راسي عمالة تلف تلف .. الوجع زى مايكون بيدغدغ
نافوخي .

ايفان ايفانوفيتش : (يتقدم من منضدة بتروف . يقف خلف
ظهره ، ويهمس في أذنه) كل الناس باصين لك .. ايه
التبسط ده ؟ المدير ما يصحش أبدا يكشف عواطفه
الشخصية .

بتروف : بس أنا يعنى .
ايفان ايفانوفيتش : (هامسا) انت ايه اللي جابك ؟
بتروف : ما أفطرش ؟
ايفان ايفانوفيتش : ادى أمر .. الفطار بييجى لك فى المكتب ؟
بتروف : على ما يجيبوه الشاى يبرد .
ايفان ايفانوفيتش : ما انتش قادر تقدم تضحية تافهة زى دى فى
سبيل بناء الاشتراكية .

لوسيا : واقف ليه ؟ ماتقعد .
ايفان ايفانوفيتش : مانيش قاعد يا لوسيا . (يهمس فى أذن
بتروف) ما يصحش مروسين حضرتك يسمعوا كلامنا .

لوسيا : مين الراجل دا ؟
بتروف : دا ايفان ايفانوفيتش .
ايفان ايفانوفيتش : آنسة لوسيا .. (مشيرا الى منضدتها) الشاى
بتاعك برد .

لوسيا : (لبتروف) قصده ايه ؟

بتروف : ايفان ! التدخل فى حياتى الخاصة شىء أنا ..

ايفان ايفانوفيتش : اذا نظرت لجوهر القضية تلاقى انك مالكش حياة خاصة ولا يمكن أن تكون لك حياة خاصة . أنا أعتبر أن حياتك الخاصة وهم لم يكن له وجود ولن يكون له وجود .. اصرفها .. خليها تقوم تقعد على ترايبزتها .. بص .. شايف سكرتيرك ؟

(بتروف ينظر الى السكرتير)

شايف السكرتير باصص لكم باستهزاء ازاي .. عاجبك كده أديك عشت وشفت ان السكرتير يتريق عليك .. بص للفراشة !

(بتروف ينظر الى تاتيانا)

مش عجبها طبعاً انك تستعرض علاقاتك العاطفية مع البنات دى .

لوسيا : بتروف ! مين الراجل دا ؟

بتروف : ايفان ! ارجوك حل عنى من فضلك !

الجرسونة : (وقد أحضرت السجق والشاي لا مؤاخذه . مافيش ليمون .

بتروف : مافيش ازاي ؟

الجرسونة : خلص

بتروف : ابعثوا اشترؤا

الجرسونة : حاضر ! (تنصرف)

ايفان ايفانوفيتش : شايف ازاي مالكش هيبه .. مش هالين عليهم
يتعبوا نفسهم شوية عشان يريحوك . عشان يريحوا مدير
المؤسسة وزعيم المدينة كلها .. مش قادرين يدبروا فص
ليمون .. اديك شفت بنفسك . تقدر تقول لى بقى تتعاون
مع مجموعة مهملة بالشكل ده ازاي ... تقدر ازاي تحقق
فى الجو دا انتصارات وانجازات عظمى على طريق التقدم
والرخاء .

بتروف : فعلا ! دى فوضى !

ايفان ايفانوفيتش : تمام التمام . جوهر القضية ان الفوضى هى أكبر
خطر على الصالح العام . والعدو بالطبع ممكن يستغل
الظروف ... والا أنا غلطان ؟

بتروف : مش عارف .. جايز .. لا طبعا .

لوسيا : بتروف ! جرى لك ايه ؟

بتروف : ماترفعيش صوتك من فضلك .. جوهر القضية ان أنا
أولا وقبل كل شىء ..

لوسيا : كل دا عشان فص ليمون ! انت اتجننت ؟

ايفان ايفانوفيتش : سامع .. هى حصلت ؟ تقول عليك مجنون ..
وساكت ؟

لوسيا : أقول عليك ايه ؟ بيروقراطى .. مش كفاية .. دا انت
بقيت أسوأ من كده بكثير .

ايفان ايفانوفيتش : وكم ان بتتهمك بالبيروقراطية سامع كل كده
وساكت ؟

بتروف : لوسيا ! الشاى بتاعك فعلا حبيبرد

لوسيا : انت بتطردنى ؟

بتروف : ايه (وقد أفاق) بتقولى ايه • بتقولى ايه ؟

لوسيا : مابقولش حاجة (تنهض وتغادر الكافيتيريا)

بتروف : لوسيا !

ايفان ايفانوفيتش : (يكلم بيده فم بتروف) ايه الى بتعمله دا ؟
الناس كلهم شايفين وسامعين !

بتروف : مشيت ؟

ايفان ايفانوفيتش : أحسن !

بتروف : لكن دا أنا تقريبا طردتها !

ايفان ايفانوفيتش : لا أبدا • كل ما هناك انك اديت واجبك
المقدس • وضعك الخاص يفرض عليك بعض التضحيات •

(فى هذه الاثناء يكون العاملون قد انفضوا حتى لم يبق غير
أبو برنيطة خوص وأبو كسكته وبتروف وايفان)

بتروف : أنا بحبها !

ايفان ايفانوفيتش : اذا تعمقنا فى جوهر القضية نجد أن وضعك
الخاص لا يسمح لك أبدا بالحب • وحتى لو كنت تحب
فوضعك الخاص لا يسمح لك أبدا باظهار عواطفك •

أبو كسكته : (يقترب من بتروف) تصرفك داغلط !

ايفان ايفانوفيتش : انت مش عاوز تحترم نفسك انت مين وبتعلم
مين ؟ مش عارف مين الى انت بتكلمه ؟ (لبتروف) شايف !
آدى آخرة تسامحك وطيبة قلبك • آديك شايف النتيجة •

بتروف : (ينهض فجأة ٠٠ ويدق المنضدة بقبضة يده بعنف صائحا)
كفاية !

أبو برنيطة خوص : بيزعق لمن ؟
ايفان ايفانوفيتش : هس ادى اللحظة الحاسمة !
بتروف : كفاية ٠٠ كل واحد لازم يعرف حدوده .

أبو برنيطة خوص : قصدك ايه ؟
ايفان ايفانوفيتش : (يضع يده على قلبه) باين عليك مش
حتستحمل !

بتروف : كفاية ٠٠ أنا حشوف ازاي أفرض احترامى على الكل !
ايفان ايفانوفيتش : (بصوت هادى ينم عن الرضا) برافو !
(تدخل الجرسونة جاملة فص الليمون)

الجرسونة : اتفضل

بتروف : (يجلس) هاتى اثنين شاى . اقعد يا ايفان . (لآبو
برنيطة خوص) تشرب شاى ؟ (للجرسونة) خليههم ثلاثة .

(ايفان وأبو برنيطة خوص يجلسان فى مواجهة بتروف)
ايفان ايفانوفيتش : (يقدم علبة سجائر الى بتروف) اتفضل !
بتروف : مابدخنش .

ايفان ايفانوفيتش : مش ناوى تتعلم ؟

بتروف : جايز

ايفان ايفانوفيتش : وساعتها حتبقي تشتري السجائر منين ؟
قصدى يعنى حتبقي تبعت تشتريها منين ؟

بتروف : ايه الى منين ؟ من مطرح السجاير ما تتباع !
ايفان ايفانوفيتش : (برقة) ودا برضه كلام .. أولا وقبل كل
شئ .. اذا تعمقنا فى جوهر القضية نلاقى انك انت أو أى
واحد من المقربين لك عشان يجيب سجاير مضطر يروح أو
يبعت يجيب السجاير من المحل .. وهو دا برضه معقول ؟
أبو برنيطة خوص : دا لا يمكن يحصل !

بتروف : امال ايه العمل ؟
ايفان ايفانوفيتش : انت لازم تخطط فورا لتكوين قسم خاص
لامدادك بالسجاير انت لوحدهك . ويعنى مافيش مانع عدد
محدود من حبايبك ينتفعوا بالمشروع

أبو برنيطة خوص : دا كلام سليم .. طبعا مش ممكن أبدا أن
وقتك الثمين أو وقت أصحابك المقربين يضيع فى تفاهات
زى دى .

بتروف : أولا .. وقبل كل شئ .. اسسمحوا لى أشكركم على
اهتماماتكم الاخوية وعلى عنايتكم براحتى .
(الجرسونة تحضر الشاى)

(للجرسونة) بعد كده تبقى تجيبى لى الشاى فى المكتب ..
مفهوم (لايفان وأبو برنيطة خوص) آه .. أنا كنت بتكلم
عن ايه ؟ المدينة دى لما أنا جيتها كانت عبارة عن أنقاض ..
وأنا قررت بدء العمل فورا عشان نرجع الاوضاع لحالتها
الطبيعية .. كان لازم فى كام شهر نخلى البلد تبقى جنة على
الارض . وبكل همة وحماس كنت بشتغل بنفسى بالكريك

.. وأدى نتيجة شغلي وكفاحي أي مخلوق ما يقدرش النهارده
ينكر الانتصارات والتغيرات الباهرة الى اتحققت تحت قيادتي

أبو كسكته : (يقفز من مقعده ويهجم على ايفان ايفانوفيتش) انت
وغد .. خنزير .. ماعندكش ريحة الضمير .. ايه الى انت
عملته في الانسان دا الى كان انقى من الذهب .

(يطرح ايفان أرضا ويوسعه ضربا)

ايفان ايفانوفيتش : الحقوني .. الحقوني .. حيموتني !

(بتروف وأبو كسكته يحاولان تخليص ايفان)

بتروف وأبو برنيطة خوص : شيل ايديك .. انت بتعمل ايه ..
حتموت الراجل .. (كلهم يختلطون حتى لم يعد واضحا
أيهم يتلقى ضربات أبو كسكته)

* المشهد السادس

(حوض سباحة • على الحافة أريكة • بتروف يرى جالسا على مقعد مريح وقد التف من حوله ايفان ، أبو برنيطة خوص ، السكرتير ، مراسل صحفى • خلف ظهر بتروف يقف السائق بعيدا عن الآخرين •• أبو كسكته يجلس على الأريكة • تجري فى الحوض مسابقات فى السباحة وحول الحوض يتمشى فتيان وفتيات بالمايوهات)

أبو برنيطة خوص : (للمشاهدين) بعد انقطاع طويل يعود الرفيق بتروف الى حمام السباحة ليشترك معنا فى هذه المباريات الرياضية • ان الرفيق بتروف حريص للغاية على تنشيط الرياضة واثاحة الفرصة لكل الشباب بل كل الأطفال والمسنين وهو لا يدخر جهدا لكى يستطيع كل مواطن أن يسجل رقما عالميا •

بتروف : (مدعيا العظمة) اذا نظرنا الى جوهر القضية نجد أن الرياضة هى أهم علوم التنمية الصحية •

ايفان ايفانوفيتش : (للصحفى) كتبت

الصحفى : لا مؤاخذه ما سمعتش الكلمة الأخيرة •

أبو برنيطة خوص : كل مرة تتكرر نفس الحكاية •• صحفيين ايه دول !

السكرتير : (للصحفى) آخر كلمه : « الصحية » بس الشرط نور أفكار الرفيق بتروف تمام زى الجواهر ما يصحش حد

يسنولى عليها كلها لوحده .. يعنى تنقى لنفسك كام فكرة
والباقي تسببه لغيرك .. أوعى تفسد مشروعاتنا .

أبو برنيطة خوص : قصده الكتاب الى احنا بنحضره سوا .. وبينى
وبينكم يا حضرات المتفرجين أنا عندى مشروع خطير .. بس
أوعوا حد منكم يقول له (يشير الى السكرتير) .. أنا بحضر
بحث علمى عن الاستخدام السليم لعلامات الترقيم فى الدرر
الخالدة التى يتفوه بها الرفيق العظيم بتروف . أصلى (يشير
الى السكرتير) مش عاوزه يعرف .. لحسن يحشر نفسه
معاى .. والحقيقة يا حضرات الرفاق ان أنا من زاوية الاحترام
العميق للعلم أرفض أن يحصل شخصان على الدكتوراه على
رسالة واحدة مهما كانت أهميتها ..

بتروف : (مشيرا الى احدى السابحات) الحقيقة البنت أم طاقة
صفراء دى بتشغل ايديها صح تمام . والواقع انها بذلك
تساهم فى تطوير الرياضة القومية وترتفع بها الى آفاق
جديدة .

ايفان ايفانوفيتش : (للصحفى) ماه .. كتبت واللا فيه حاجة تانى
مسمعتهاش ؟

الصحفى : لا مؤاخذه هو قال الطاقة زرقاء .

أبو برنيطة خوص : الطاقة صفراء - يا حضرة - صفراء !

بتروف : يعجبني العوم الكرول .

السكرتير : (للصحفى) .. اوعى تكتب دى . (لآبو برنيطة
خوص) دى تفيدنا قوى فى الكتاب .. نقطة مهمة جدا ..

أبو برنيطة خوص : جدا !

أبو كسكتة : انتم اتهللتم والا ايه ؟ ايه الى (جرى) هنا ؟ طيب أنا
يعجبني العوم على الظهر مبتكتبوش دى ليه ؟

أبو برنيطة خوص : انت بتفكر بمنطق شكلى .. ياعزيزى مافيش
حاجة أبدا ممكن مناقشتها على وجه التعميم .. كل شىء
لازم يناقش على التخصيص .. على وجه التحديد .. يعنى
لازم تشوف الكلمة فى علاقتها الوثيقة بالمتكلم .. يعنى
الكلام بيتغير بتغير المتكلم .. الكلمة بتأخذ معناها الحقيقى
ووزنها وأهميتها بناء على شخصية القائل ..

أبو كسكتة : أهم من كده أن بتروف لو قال كلام يبقى له معنى
ولو أنا الى قلت نفس الكلام يبقى له معنى تانى خالص .

أبو برنيطة خوص : امال فاهم ايه ؟ ثم انك ماتقدرش تقول نفس
الكلام الى يقوله الرفيق بتروف

كل كلمة .. كل فكرة لازم تقولها بعد الرفيق بتروف ..
لا قبله ولا وياه . بعده - يا حضرة - بعده !

بتروف : السباحة هى أفضل رياضة سواء كانت فى المياه العذبة
أو كانت فى المياه المالحة !

الصحفى : لامؤاخذة .. مافهمتش قصدك ؟

أبو برنيطة خوص : وماتحاولش تفهم .. الصحفى الى عاوز يفهم
كل حاجة عمره ماحيوصل .

بتروف : جوهر القضية انى متشوق جدا لمعرفة الفائز

السكرتير : دا تقدر تكتبه

بتروف : سينتصر من هو جدير بالنصر

السكرتير : اوعى تكتب دى •

بتروف : ايفان ايفانوفيتش

ايفان ايفانوفيتش : تحت أمرك

بتروف : التدخين ممكن !

ايفان ايفانوفيتش : (يلتفت الى السكرتير) التدخين ممكن ؟

السكرتير : (يلتفت الى المجموعة الواقفة بجواره) التدخين ممكن؟

عبارة التدخين ممكن (تنتقل من مجموعة الى أخرى)

بتروف : ايفان ايفانوفيتش

ايفان ايفانوفيتش : تحت أمرك •

بتروف : (مشيرا الى أبو كسكته الذى يجلس وقد وضع ساقا

على ساق) شايف قعدته ؟

ايفان ايفانوفيتش : قلة أدب (موجهها كلامه الى أبو كسكته) مش

مكسوف ؟

أبو كسكته : أنكسف من ايه ؟

ايفان ايفانوفيتش : دا ذوق •• دى تربية •• تقعد القعدة دى فى

وجود الرفيق بتروف

أبو كسكته : أنا مبخطش رجلى على مناخير بتروف •• كل واحد

يقعد على راحته مادام مبيضرش حد ثانى !

ايفان ايفانوفيتش : واحترام القيادة ؟

أبو كسكته : الرجل عمرها ما كانت وسيلة للتعبير عن الاحترام

شوف أما أقولك •• خد بعضك من سكات وغور من وشى ••

اعمل حسابك انك لو وقعت تانى فى ايدى ماحدش حيقدر
يخلصك .. اتلم واقصر الشر !

ايفان ايفانوفيتش : (يعود الى بتروف) الدنيا حر قوى يا حضرة
المدير .

بتروف : حر فعلا .. (يتنهد) هيه .. قولى لى يا ايفان انت عمرك
كم سنة .. احنا زى ما نكون من دور بعض ولو انى
ساعات أبص لك يتهى لى انك أكبر بكثير .

ايفان ايفانوفيتش : (بلهجة تمتزج فيها الجدية بالسخرية) أنا
فعلا ممكن أبان قدك ، وقد جدك ، وقد جدك كمان

أبو كسكته : (مشيرا الى ايفان وهو يخاطب المشاهدين) بيتهى
لى انه كان عايش فى أيام القيصرية .. ومن عارف يمكن
جالتا مع الاطباء الطائرة الى الجرايد يتكلم عنها . وجايز
ان وجوده يرجع الى قبل كده بكثير . والى كوكب تانى ..
على أى حال مش احنا الى صنعناه .. ولا يمكن دا يكون من
طرح أرضنا الطيبة .

أبو برنيطة خوص : تسمح لى أوجه لك سؤال يا حضرة المدير ؟
بتروف : اتفضل .

أبو برنيطة خوص : أنا سمعتك مرة بتقول ان الباليه أصبح يتخلف
بالتدريج عن تطور الحياة .

بتروف : (متخليا عن عظمتة المفتعلة) أنا ؟ أمتى ؟ ..

ايفان ايفانوفيتش : (هامسا فى أذن بتروف ماتفساش نفسك !

بتروف : (محاولا استعادة العظمة المفتعلة) آه .. آه هو .. احنا
.. اذا جينا فى الواقع لجوهر القضية أنا فعلا أشرت الى ..

أبو كسكتة : (يقفز من مقعده صارخا) ماتضحكش الناس عليك
انت ايه اللي فهمك فى الباليه .. ماتحشرش نفسك فى
موضوعات ماتفهمش فيها ..

بتروف : (بصوت خفيض وقد ظهر عليه الارهاق) مافيش حاجة
ما أفهمش فيها .. أنا عارف كل حاجة .. وفاهم كل حاجة .

ايفان ايفانوفيتش : أيوه .. زدنا من علمك يارفيق بتروف .

بتروف : جوهر القضية .. ان الباليه قبل كل شىء لازم يطور
تقاليدنا الكلاسيكية .. ولازم اننا نغنى الباليه السوفيتى
بانتصارات الباليه الروسى ، لازم ياخدوا فى اعتبارهم أنهم
يشعرونا واحنا بنتفرج على الباليه السوفيتى بشعور العزة
القومية .

أبو برنيطة خوص : (لأبو كسكتة) هيه .. ايه رأيك ؟

أبو كسكتة : طيب وجاب ايه من عنده .. هو فيه حد مختلف على
البديهيّات دى . لكن ..

أبو برنيطة خوص : هس !

بتروف : على انه لايجوز الخلط بين البادي .. البادي .. الباديكاتر
وبين الباديس-بان ، والا وقعنا فى مستنقع الاتجاهات
الانحلالية .. لا يمكن أبدا أن نسمح فى مجال الباليه
بالنزعات الذاتية والفردية .

أبو كسكتة : (لأبو برنيطة خوص) ودلوقتى ايه رأيك انت ؟ ليه

بس يا عالم ترغموا الراجل يقول كلام فارغ !

بتروف : وللأسف الشديد أن الأخطاء المنتشرة فى الباليه موجودة

أيضا في مجال الفلك .. ففي الفلك لايجوز أبدا أن نركز
اهتمامنا على نجم أو كوكب معين أكثر من غيره .. ولو راعينا
المسألة دي كنا ماواجهناش الاخطاء الشنيعة اللى بيقع فيها
علماء الفلك .. احنا لازم نحقق في مجال الفلك انتصارات
كبيرة جبارة تلهمنا مضاعفة انتصاراتنا البطولية الحارقة ..

أبو كسكته : (لآبو برنيطة خوص) زقطط انت

الصحفى : لامؤخذة يارفيق بتروف .. ممكن تقول مين بالذات من
علماء الفلك اللى وقعوا فى أخطاء شنيعة عشان نحذر القراء
من أرائهم المنحرفة .

(بتروف ينظر الى ايفان مستنجدا)

ايفان ايفانوفيتش : لو كان الرفيق بتروف شاف ضرورة انه يعلن
الاسماء كان أعلنها من غير أسئلتك الى مالهاش مناسبة .

أبو برنيطة خوص : تأكد ان الاسماء حتعلن فى الوقت المناسب !

السكرتير : تحب حضرتك تقول كلمتين للبطلة الجديدة اللى ضربت
رقم قياسى عالمى .

بتروف : آه .. بكل سرور .

(السكرتير يقود خطوات لوسيا وهى بالمساويه وقد خرجت

لتوها من السباق . المصور يعد الكاميرا)

ايفان ايفانوفيتش : (للسكرتير) .. جتك البلا .. ايه الى خلاك
تجيبها ؟

بتروف : ينظر الى لوسيا ويبدو انه لم يعرفها ثم يقول بنعمة جادة
أهنئك بفوزك وتسجيلك الرقم القياسى العالمى .. أنا

شخصيا مارست السباحة فترة طويلة من قبل . وللسباحة دور هام فى حياتنا وأخلاقنا واقتصادنا . ان الرياضة فى حقيقة الأمر تقوى الصحة .. فعليك بحب السباحة . والسباحة هى أفضل رياضة سواء فى الماء المالح أو الماء العذب .. عاشت السباحة !

لوسيا : (تستمع الى هذه الكلمات والدموع تترقرق فى عينيها)
بتروف !

بتروف : (دون أن يلاحظ شيئا) اتكلمى .. ما تنكسفيش ..
تقدرى تقولى للسكرتير على كل العقبسات أو المتاعب الى بتواجه جمعيتكم الرياضية .. حنحقق أكيد .. ونعمل اللازم فوراً .. قولى على كل حاجة ..

لوسيا : (يائسة) بتروف !

بتروف : بتنادى على مين ؟

ايفان ايفانوفيتش : بتنادى على رئيس الفريق .. مجرد تشابه فى الاسماء . عاوزه تفرحه بان حضرتك أبديت اهتمام عظيم بمشاكلهم (يأخذها من يدها ويبعدها) لو سمحتى الرفيق بتروف عنده مشاغل كثيرة .

لوسيا : بتروف ! (تسقط مغشيا عليها)

بتروف : جرى لها ايه ؟

(السكرتير وابو برنيطه خوص يحيطان بها)

السكرتير : اغماء بسيط من الارهاق .

بتروف : اعرضوها على الدكتور بتاعى .

(السكرتير وأبو برنيطة خوص يحملان لوسيا ، وايفان يتبعهما)

أبو كسكتة : ما عرفت هاشي ؟

بتروف : (صادقا) مين دي ؟

أبو كسكتة : لوسيا !

بتروف : (يحاول جاهدا أن يتذكر) لوسيا ! لوسيا ! لوسيا !
رأسي بتلف .. نافوخي حينفجر !

(ايفان يعود)

ايفان ايفانوفيتش : سلامة نافوذك .. (يعطيه قرصا) ابلغ
القرص ده والالم يروح علطول .

بتروف : زهقت من الحبوب .. نفسي اتحرك .. (ينصرف)

(السكرتير وأبو برنيطة خوص يدخلان)

السكرتير : النهارده حر !

أبو برنيطة خوص : في أيام الحر .. الواحد يرطب جسمه بالعموم
.. في مياه مالحة .. في مياه عذبة على حدين سواء .

السكرتير : دي من حضرة المدير .

أبو برنيطة خوص : دي من أعرق أفكار حضرتي .

ايفان ايفانوفيتش : العبارة دي لازم تتكتب بحروف من ذهب
وتتعلق على مدخل ملعب الكورة .

أبو كسكتة : طيب وايه علاقة العموم بالكورة .

السكرتير : كل كلمة يقولها الرفيق بتروف ترتبط أوثق الارتباط
بكافة جوانب حياتنا الثقافية والاجتماعية .

(يدخل بتروف مرتديا الروب • يهرع السكرتير اليه ليساعده
على خلع الروب فيظهر بتروف بالمايوه)

ايفان ايفانوفيتش : (بجزع) انتم بتعملوا ايه ؟
السكرتير : فيه حاجه ؟

بتروف : (بدهشة) جرى ايه ؟

ايفان ايفانوفيتش : لبسه الروب فوراً •

(السكرتير يلقي الروب على كتفى بتروف)

بتروف : (حائراً) ايه يا ايفان •• فيه ايه ما تفهمنى !

ايفان ايفانوفيتش : ودى حاجة عاوزه تفهيم •• وهو فيه قائد بيان
قدام الناس عريان ؟

بتروف : لكن انا عاوز أعوم •• يعنى أنزل الميه بهدومى •

ايفان ايفانوفيتش : انا عامل حساب كل شىء • دقيقة واحدة (للسائق)
ساشا (يعطيه اشارة بيده) يللا !

السائق : حاضر •

(تنزل ستارة فتقسم الحمام قسمين ، فى احدهمسا يبقى
بتروف وايفان وابو برنيطه خوص والسكرتير ، وفى الجانب
الآخر يبقى أبو كسكته وآخرون)

ايفان ايفانوفيتش : (يساعده بتروف على خلع الروب) دلوقتى ••
اتفضل عوم •• بالطريقة دى قدامك حمام خصوصى •• كده-
ما فيش حد حيقدر يقطع حبل أفكارك الموجهة لخدمة البشرية •

(بتروف ينزل الحمام •• السائق والسكرتير يحضران
طوقاً من المطاط مربوطاً فى عصا طويلة سميكة)

السكرتير : (لايفان) يا خير أبيض .. كنا حننسى
ايفان ايفانوفيتش : يناول الطوق لبتروف الذى يسبح فى الحمام
لو تكرمتم البس الطوق دا يا حضرة المدير .
بتروف : مالوش داعى .. انا بعوم كويس .

ايفان ايفانوفيتش : ولو ! اخنا ملزمين باتخاذ كل الاحتياطات
لضمان أمن وسلامة قائد عظيم زى حضرتك .
السكرتير : البس .. البس .. حياتك ملك الشعب

(بتروف يلبس الطوق .. ابو برنيطه خوص والسكرتير
والسائق يسحبون بتروف على صفحة الماء بواسطة السنادة
المثبتة فى الطوق) .

بتروف : كفاية .. يا عالم انا مقدرش استحمل تضعيات زى دى ..
حتى لو كانت فى سبيل الشعب .. دا مش عوم .. دا
عذاب .. طلعونى .. طلعونى من فضلكم .

(ينتشلون بتروف ، السكرتير والسائق ينزعان الطوق
ويحملانه ، ابو برنيطه خوص يضع الروب على كتفى بتروف ،
خلف الحاجز لا يبقى غير ابو كسكته ، تتهادى الى الاسماع
موسيقى أوركسترا لية) الموسيقى دى مش عاجبانى .. انده
لمايسترو . (ابو برنيطه خوص ينصرف لاستدعاء
المايسترو)

ايفان ايفانوفيتش : مايصحش تستقبله بالهيئة دى .. البس
هدومك لو تكرمت .

(ينصرف بتروف .. يدخل المايسترو)

المايسترو : الرفيق بتروف طالبنى ؟

ايفان ايفانوفيتش : ايوه .. استعد .. حيسلخ فروتك .

بتروف : هيه .. ندهت للمايسترو .

ايفان ايفانوفيتش : أهوه تحت أمر حضرتك !

بتروف : هيه .. انت المايسترو ؟ عظيم ! قول لي ايه الزيغة دي
الى انت عاملها .. بقى دي موسيقى ممكن تلعب دور في
الازدهار الروحي لشبابنا .. تكونش فاهم انك بالزيغة دي
بتحارب الرواسب البورجوازية في وعي الجماهير ؟ امال نر
ماكانش عندنا تراث عظيم .. تراث عبقرى من المؤلفات
الكلاسيكية .

المايسترو : طيب .. ما هو .. ما الى كنا بنعزفها دي .. مقطوعة
لتشايكوفسكى .. هو حضرتك ما بتعتبرش موسيقى
تشايكوفسكى من التراث الكلاسيكى ؟

بتروف : (يتخذ مظهرا غاضبا انت بتشك في اني بعتبر
تشايكوفسكى من الكلاسيكيين .. على أى أساس -يا حضرة-
بنيت شكوكك .. ثم انت ازاى تشك في ان تشايكوفسكى
كلاسيكى . انت مش عارف ان « رقصة البجع » تعتبر من
روائع الموسيقى العالمية .. احنا كلنا لما بنسمعها بنشعر
بزهو عظيم واعتزاز بتراثنا القومى .. المقطوعة دي لازم
الراديو يذيعها عشر مرات في اليوم .. ويكون احسن لو
أذاعها عشرين مرة .. بلغ التعليمات دي ..)

(ينصرف المايسترو)

بتروف : اما أنا شربت حنة مقلب .. فضيحة !

ابو كسكنه : فعلا فضيحة .

ايفان ايفانوفيتش : فضيحة ايه ؟ الرفيق بتروف لا يمكن يتفضح
قدام حته مايسترو .

بتروف : الراجل كان باين عليه بيعتقرنى بشكل !

ايفان ايفانوفيتش : الحساسية البورجوازية مش لايقه عليك .

بتروف : لكن الناس فى البلد كلها زمانهم بيتريقوا على

أبو كسكته : مش كل الناس .. الاصدقاء : بالعكس يشفقوا عليك
ونفسهم يسساعدوك لكن انت مش فاضى لهم ، ولا حتى
فاكرهم .

ايفان ايفانوفيتش : ايه الكلام الفارغ دا ؟ فيه حد يستجرى يتريق
على الرفيق بتروف ؟ ثم هو الرفيق بتروف محتاج لحد يشفق
عليه المسألة كلها ان الناس هايياك .. جوهر القضية انك
انت يا رفيق بتروف خالق البلد وملهمها .. وامسك حيظل
للأبد مقترن بانتصاراتها وأمجادها .

بتروف : أنا تعب ان خالص . حاسس كده زى ما يكون فيه حجر
راكز على قلبى .. ماعدتش بدوق طعم الرضا فى أى حاجة ،
انا بتقطع .. بتمزق !

أبو كسكته : ولسه ياما حتشوف .. الحق نفسك .. فوق من
الكابوس اللى انت فيه .

ايفان ايفانوفيتش : رفيق بتروف .. تمالك أعصابك كويس ..
القادة اللى زيك اعصابهم لازم تكون حديد .

بتروف : (يحاول تصنع الصلابة) انا أعصابى قوية . ما حدش
أبدا يقدر يشك فى قوة ارادتى . يا سلام لو البلد كان فيها
اثنين كمان زىي ! كنتم ساعتها شفتم النجاح والانتصار

والتفوق الى نقدر نحققه على طريق التقدم والرخاء .. تكن
للأسف ما فيش حد زى .. أدور فين بس على الى زى ؟

ايفان ايفانوفيتش : مش كل واحد يقدر يبقى بتروف ..
أبو كسكته : (لبتروف) شوف .. أما أقولك ..

(السكرتير يدخل مذعورا)

السكرتير : (يقدم له برقية) تلغراف جايلك يا حضرة المدير ..
الامانة طالباك فورا التلغراف بامضاء كونستنتين سيرجيتش
شخصيا .. وكمان طلبوك بالتليفون والامين المساعد كان دو
بنفسه الى بيتكلم *

بتروف : مهماش عارفين يسيلكوا من غيرى . هو انا فاضى لهم ..
انى عندي مشاغل مالهاش أول ولا آخر .. لكن لازم كل شهر
يستدعونى *

أبو كسكته : كل شهر ايه .. هو حد استدعاك من ثلاث سنتين !

بتروف : أنا لازم أسافر النهارده .. ما يصحش أضيع دقيقة واحدة
التأخير دقيقة واحدة ساعات بيضيع أعظم الانتصارات .
التأخير ممكن يتسبب عنه تعطيل كبير لعمليات تعميق
وتوسيع وتطوير البناء الاشتراكى .. أيوه أنا مقدر الظروف
كويس .. ما دام طلبونى أساعدهم يبقى لازم أساعدهم فورا .
(بتروف والسكرتير يخرجان)

ايفان ايفانوفيتش : (لأبو كسكته) شفت ؟ مش قلت لك حقضى
على بتروف فى الفصل الثانى .. ه .. ه .. ه ما

أبو كسكته : (على الجانب الآخر من الحاجز أصلك نذل حقير
ما عندكشى ريحة الضمير *) يحاول ضرب ايفان .. لكن

الحاجز يقف حائلا) طيب بكرة تشوف مين فينا الى حيضحك
فى النهاية .

ايغان ايفانوفيتش : (بتلذذ) بتقول ايه ؟ مين الى حيضحك فى
فى النهاية قصدك يعنى فى نهاية المسرحية ؟ (يسترسل
وكانه قد خمن الاجابة) آه طبعا .. طبعا . فى الحتام
الشريف ينتصر ، والمنحرف يتوب عن طريق النقـد
الذاتى .. وتنتهى الحكاية بحفلة عرس .. أو حفلة تكريم
على الأقل .

ابو كسكته : انت ايه حطيت عينك على المؤلف .. ناوى تفسده
هوه راخر ؟

ايغان ايفانوفيتش : ايه يعنى .. صعبه دى .. دلوقتى تشوف .
(يصرخ فى الكواليس) انت يا الى هناك .. ناظم حكمت ..
ناظم حكمت .. انا عارف انك بتعتبر الاتحاد السوفيتى
وطنك الثانى . وعارف مقدار حبك واحترامك للناس
السوفيت .. انت أخ قديم وصديق عزيز .. دا كله معروف
.. بس يعنى .. ليه تخلى مسرحيتك الاولى عن روسيا
ساخرة بالشكل دا ؟ ليه يا ناظم تشوه كده صورة بتروف ؟
وليه اخترتنا احنا بالذات . هوه يعنى احنا ناقصين هموم ..
ما تسبنا يا أخى فى حالنا .. ثم ما تنساش انك بتحل
نفسك فى موقف محرج جدا . مينا كان مائنساش انك
برضه تعتبر ضيف عندنا .. وما يصحش أبدا تستغل كره
الضيافة السوفيتى .. آى نعم الواحد ما يصحش يحجر على
ضيفه .. لكن ساعات الظروف يتحكم .. أنا فى الحقيقة
عازك تصرف النظر عن المسرحية دى . بيتهميا فى دا أحسن
لك ، وأحسن لنا وأحسن للمسرح ذاته .. تفكر مين

يستجري يمثلها .. دا اذا اتلقى المسرح الى يوافق أصلا
على قبولها . وعلى العموم اذا كنت مصر تكتب عن الموضوع
دا يبقى لازم يا عزيزى تشوف لك نهاية كويسة .

صوت المؤلف : عبثا يا ايفان تحاول . ان الاتحاد السوفيتى هو
بالفعل وطنى الثانى ، واننى حقا أحب السوفيت من كل
قلبى .. ولهذا بالذات فاننى أفعل مالا بد ان يفعله انسان
شريف فى موقفى . وحتى لو افترضنا اننى فقط مجرد ضيف
على الاتحاد السوفيتى .. وحتى لو كنت ضيفا نزل على هذا
البيت الرائع ، فكيف لى أن أرى شعبانا يتسلل الى البيت ثم
لا أحاول سحقه .

لأننى أكرهك يا ايفان ، ولأننى أثق بقدرة بتروف على التحرر
من برائتك فاننى أجد لزاما على أن أمضى فى كتابة هذه
المسرحية حتى النهاية .. ولسوف تكون النهاية عكس
ما تبغى !

أبو كسكته : النهاية حتبقي على هوانا احنا (هازنا بايفان) هـ ..
هـ .. هـ .. ها .

سمتار

الفصل الثالث

● المشهد السابع

(أبو كسكته وأبو برنيطة خوص يدخلان)

أبو برنيطة خوص : الساعة كام .. احنا اتاخرنا ؟

أبو كسكته : لا .. أبدا .

أبو برنيطة خوص : أنا نفسى قوى أشوف البلد دى حتستقبل بتروف ازاي ؟

أبو كسكته : دا فعلا مريضوع شيق .

أبو برنيطة خوص : يمكن يقابلوه بالزهور والخطب الرنانة ..

أبو كسكته : والتاكسات والأوتوبيسات والترولى باسمات والترمايات كمان .

أبو برنيطة خوص : فاضل عشر دقائق والقطر يوصل .. تحب أقول لك نكته ؟

أبو كسكته : حازقاك قوى ؟

أبو برنيطة خوص : عن الكلب الأبيض .. عارفها ؟

أبو كسكته : عن الكلب الأبيض ؟ لا معرفهاش .

أبو برنيطة خوص : (للمشاعدين) يمكن كثير منكم عارفين النكته دى .

أبو كسكته : بطل رغبى .. قول بقى وخلصنا .

أبو برنيطة خوص : (مخاطبا المشاهدين) كان فيه واحد رسام
 حظه ضارب قوى . . أى لوحة يرسمها تتباع حالا
 حتى لو رسم تفاحة ، حوش مصنع ، فصل فى مدرسة ،
 منظر على البحر ، كل لوحاته كانت المعارض بتشتريها هوا .
 زمايل الرسام دا استغربوا قوى . . سألوه عن سر شطارته
 . . الرسام دا عمل متضايق شويه وبعدين قالهم : أنا الحقيقة
 ما كنتش ناوى اكشف السر ، لكن معلش أقول لكم . بقى
 أنا دايم فى كل لوحة أرسم كلب أبيض صغير فى ركن من
 الأركان . فطبعاً أعضاء لجنة المشتريات الفنية يروحوا
 معترضين على اللوحة وقايلين لى كلهم فى نفس واحد . .
 « وايه لزوم الكلب دا ؟ الكلب دا لازم يتشال » أقوم ارد
 عليهم : « لا يمكن . . الكلب دا عنصر أساسى فى تكوين
 اللوحة » فيصروا هم على شيل الكلب وأصر أنا على وجود
 الكلب . . وعلى كده المناقشة تاخذ لها ساعتين - ثلاثه وفى
 الآخر . . أقول لهم : « أدونى لو سمحتم وقت أفكر فى
 المشكلة على رواقه » . وبعد كام يوم أقوم رايح لهم وأقول
 لهم : « انتم فعلا على حق ! نقدكم كان فى محله . . وأنا
 اقتنعت برأيكم وشيلت الكلب فعلا » فطبعاً يقبلوا اللوحة . .
 وبكده هم ينبسطوا وأنا أتبسط .

أبو كسكته : عارف مين اللى جاي دا ؟

(على المسرح يرى الكسندر سيمونوف ماشيا)

أبو برنيطة خوص : مين ؟

أبو كسكته : دا الكسندر سيمونوف .

أبو برنيطة خوص : شغلته ايه ؟

أبو كسكته : عامل اشترك فى الهجوم على القصر الشتوى للقيصر
يوم الثورة ، وأيام الحرب الأهلية كان من الفدائيين الى قاتلوا
فى سيبيريا . (لالكسندر سيمونوف) ازيك يارفيق
سيمونوف .

الكسندر سيمونوف : نهارك سعيد .
أبو كسكته : على فين كده مستعجل ؟
الكسندر سيمونوف : رايح محطة القطر .
(ينصرف الكسندر سيمونوف)

أبو كسكته : فى فترة التعمير رجع لشغله . وكان من أوائل المبتكرين
ولما قامت الحرب العالمية الثانية انضم للفدائيين .
أبو برنيطة خوص : ودلوقتى طلع على المعاش .
أبو كسكته : لا أبدا . . . يشتغل رئيس ورشة .
(يمر على المسرح الكسى سيمونوف)

أبو كسكته : شايف مين الى جاى ؟
أبو برنيطة خوص : مين دا ؟
أبو كسكته : دا الكسى سيمونوف .
أبو برنيطة خوص : يشتغل ايه ؟

أبو كسكته : فلاح . . كان من رواد منظمة الشباب ، وفى أيام
التحويل التعاونى للزراعة اشترك فى النضال ضد كبار الملاك
وبعدين ساهم فى بناء محطة كهربة الدينير (لالكسى
سيمونوف) ازيك يارفيق سيمونوف)

الكسى سيمونوف : نيارك سعيد .

أبو كسكته : جاى منين ؟

الكسى سيمونوف : من المحطة .

أبو كسكته : أيام الحرب اتجرح مرتين . وبعد النصر سافر للدول
فى تعمير منطقة الفولجا - دون

أبو برنيطه خوص : ودلوقتى تلاقيه على المعاش .

أبو كسكته : لا أبدا . دا عضو مجلس ادارة كوخوز .

(على المسرح تمر نينا سيمونوفا)

شايف الى جايه دى ؟

أبو برنيطه خوص : مين ؟

أبو كسكته : نينا سيمونوفا .

أبو برنيطه خوص : بتشتغل ايه ؟

أبو كسكته : أدبية . فى أيام حصار ليننجراد أسرتهـا كلها
استشهدت . ساعتها هى كانت صبية صغيرة . لكن
اشتركت فى أعمال الدفاع بهمة عالية وبعد النصر التحقت
بجامعة موسكو واتخرجت من كلية الآداب . (لـنينا
سيمونوفا) ازيك يارفيقة سيمونوفا !

نينا سيمونوفا : نهارك سعيد .

أبو كسكته : مستعجلة على فين ؟

نينا سيمونوفا : رايحه المحطة .

أبو برنيطه خوص : زمانها اترستقت فى مجلة سمينة

أبو كسكته : لا غلطان . دى سافرت تشتغل فى مشروعات تعمير
الصحارى وبقالها ثلاث سنين هناك . مابتجيش غير فى

الأجازات السنوية .. أصلها اتجوزت هناك وبتشغل في

المكتبة وتكتب شعر وتربي العيال .

(أبو برنيطة خوص يقهقه)

أبو كسكته : بتضحك على ايه ؟

أبو برنيطة خوص : يضحك على المؤلف الي عامل لينج استعراض

لعيلة سيمونوف .. الأشخاص دول كلهم حاشرهم في اللعبة

ليه .. راجل مكار عاوز يحمي نفسه من النقد لحسن يتهموه

بتزييف حقيقة الشعب السوفيتي ، وتسليط الضوء على

النماذج السلبية ، واعطاء أدوار ثانوية لعدد محدود من

العناصر الايجابية بعض الشيء مثل ماريا أو أنا ليكولايفنا أو

أبو كسكته .

أبو كسكته : ياما نفسي ادشدهش دماغك بالعصا دي .. بس

العصا مش هأينة على .. لهو حضرتك فاهم ان بتروف بطل

غير ايجابي .. طيب بعد المسرحية ماتخلص ابقى فكر في

بيتكم على رواق .. خرينا دلوقتي في شغلنا .. بتروف

قرب يوصل .

أبو برنيطة خوص : يا خبر .. دا احنا نسينا نشترى ورد

(ينصرف) .

(محط القطار .. وصل القطار منذ لحظات على الرصيف

يرى بتروف وايفان واقفين أمام العربات)

بتروف : مش جاز القطار وصل قبل الميعاد .

ايفان ايفانوفيتش : جاز جدا ..

بتروف : دا أكيد .. آمال ليه مافيش حد بيستقبلنا ؟

ايفان ايفانوفيتش : فعلا .. حاجة مش مفهومة أبدا .

بتروف : طبعا هم الى حيقولوا خطبة الترحيب فى الاول ؟

ايفان ايفانوفيتش : دا المفروض .

بتروف : بيتها لى لازم يخطب ممثلين عن الأمانة ، والنقابات
والعمال .

ايفان ايفانوفيتش : مفيش شك .

بتروف : وضرورى الأطفال حيقدموا لنا باقات الزهور

ايفان ايفانوفيتش : أكيد .. امال !

بتروف : وبعد خطب الترحيب أقول أنا كلمة شكر . أهى جاهزة
معاى (يخرج الأوراق من جيبه) حتأخذ لها حوالى ٣٠
دقيقة .

ايفان ايفانوفيتش : مش ممكن تمطها شوية ؟

بتروف : ممكن قوى .. نخليها أربعين دقيقة .

ايفان ايفانوفيتش : بيبقى عظيم .

بتروف : لكن ليه ماحدث جه .. بقى معقول ساعتى وساعتك
وساعة المحطة كلها مقدمة ! حاجة تمخول .

ايفان ايفانوفيتش : قبل كل شىء .. انت لازم تحافظ على هدوء
أعصابك وثقتك بنفسك .. أهم .. جم أهم الشـباب فى
المقدمة .. يا خبر ؟ كل دى أزهار .

(الفتيان والفتيات يسرعون الخطى حاملين باقات الزهور)

أصوات : اتأخرنا .

فى آنى عربية ؟

كل دا من تحت راسك .

نمرة العربية كام ؟

(بتروف يأتى بحركات تنم عن تأهبه للتوجه اليهم)

ايفان ايفانوفيتش : (يوقفه) استنى .. خليههم هم الى ييجوا ..
ما تنساش الهيبة والهالة .

اصوات : اهم .

آه .. فعلا .

ايفان ايفانوفيتش : (لبتروف) اهم شافوك .. دلوقتى ييجوا لك
(المستقبلون يتدافعون الى العربية التى يقف امامها بتروف
وايفان . لكنهم ينصرفون عنها)

بتروف : ايه ده ! راحوا فىن .. وقفهم يا ايفان .. اجرى وراهم ..
قول ليم انى هنا .. اجرى .

ايفان ايفانوفيتش : مالوش لزوم .. دول مش جاين لك .. دول
بيستقبلوا لوسيا .

بتروف : لوسيا مين دى ؟

ايفان ايفانوفيتش : نجمة رياضية صاعدة .. ضربت الرقم القياسى
فى السباحة .. اتارينا جاين معاها فى قطر واحد .

(لوسيا تمر بهما وفى يدها باقة زهور وقد احاطت بها
المعجبون)

بتروف : دول اكيد مجانين .. جاين يقابلوا حنة رياضية وأنا هنا
.. طيب امال مين جاى يقابلنى أنا ؟ فىن الجمهور ؟ فىن
الزهور ؟ .. فىن خطب الحفاوة والتكريم ؟ .. آه قلبى ..

حاجة بتشكشكنى ٠٠ ابر بتنفرز فى قلبى ٠٠ صدمة كبيرة
حقيقى !

(بهو فندق ، بتروف وايفان يدخلان ، أمام شباك الاستعلامات
يقف طابور طويل من الناس)

بتروف : مش فاهم ٠٠ استتقبال ولا عملوش ٠٠ طيب وكمان
ما بيعتوش عربية ٠٠

ايفان ايفانوفيتش : المسألة يظهر حصل فيها لبس .

بتروف : لا ٠٠ دى مؤامرة ٠٠ دى من تدبير العناصر الحقودة على ٠٠
ايفان ايفانوفيتش : أكيد ٠٠ امال !

بتروف : (يشير الى موظفة الاستعلامات) احنا كمان لازم نسجيل
أسماءنا ؟

ايفان ايفانوفيتش : الروتين كده ٠٠ نعمل ايه ٠٠ خلى عندك صبر
انت أول بس ماتقول اسمك حيعملوا لك كل حاجة ٠٠
الأودة محجوزة بالتلغراف .

بتروف : (يقترب من شباك الاستعلامات ويصرخ من فوق رؤوس
الواقفين فى الطابور) مودموازيل !

رجل عجوز : (لبتروف) أقف فى الطابور يا مواطن .

بتروف : الطابور دا موش عشانى يا مواطن .

الرجل العجوز : يعنى ايه مش عشانك ؟

بتروف : دلوقتى تعرف .

الموظفة : عارز ايه .

بتروف : أنا ٠٠ بتروف .

الموظفة : وأنا زخاروفا •

بتروف : فيه أوضه محجوزه لي ••

(الجمهور يضحك)

الموظفة : جايز •• أقف في الطابور •• ولما ييجي دورك نبقى
نشوف •

أصوات : كلام سليم

ما تقف يا أخي زيك زى الناس

بتروف : انتى عارفة يا مودموازيل بتكلمى مين ••

الموظفة : عارفة •• انت مش لسه قايل اسمك •• المواطن
بتروف !

بتروف : دى فوضى •• هو أنا فاضى !

أصوات : واحنا فى نظرك ايه ؟ عواطليه ؟

يعنى احنا الى فاضيين ؟

ايفان ايفانوفيتش : (لبتروف) بس هدى نفسك •• مالكش

دعوة •• مافيش داعى للتهزى •• أنا حقه فى الطابور

بدالك • صبرك شوية وكلهم ينطردوا •• من أول المدير لحد

الفراش •

بتروف : أيوه •• كلهم لازم ينطردوا •• أنا لازم أبلغ الأمانة •

مفيش طريقة غير كده عشان البلد تتقدم وتتمدن •

ايفان ايفانوفيتش : طيب بس استريح انت دلوقتى •

(بتروف يجلس على أريكة بينما يقف ايفان فى الطابور)

بتروف : راسى بتلف .. عمالة تلف .. تلف .. زى ما يكون حد
ضربنى على نافوخي .

(تدخل أنا نيكولايفنا قتلح بتروف)

أنا نيكولايفنا : أهلا .. أهلا .. ازيك يا ابنى !

بتروف : (مشدوها لتبسطها فى التحدث اليه) أهلا .

أنا نيكولايفنا : (تجلس على الأريكة بجوار بتروف) .. هيه ..
ازيك وازى الحال .. ازى الشغل معاك ؟ .. تعرف يا ابنى
أنا كل ما أحكى لحد هنا عن طبيبتك ، وهمتك فى شغللك
ماحدثش أبدا بيصدقنى . .

بتروف : انت يا ست لازم غلطانه فى .

أنا نيكولايفنا : أغلط فيك .. يا ندامتى .. هو حد يا ابنى
يعرفك وينساك .. ما تقولش كده امال .. لهو أنا خرفت
والا ايه .. مش انت بتروف الراجل الطيب الى بيمضى
الورق على الواقف .. والناس كلها بيكلموه فى التليفون
دوغرى .. ويساعد العواجين الى زى حالاتى .. ويشيل
الماكينة للسكرتيرة .. طيب دا أنا ماخلتش حد أعرفه الا قلت
له آدى واحد .. ولو انه مدير لكن برضه انسيان زينا كده
بالضبط .. الله مالك يا ابنى كده سباكت .. هو انت مش
بتروف ؟

بتروف : أيوه . أنا بتروف .

أنا نيكولايفنا : امال مالك .. دا أنا مبسوطه قوى الى شفتك .
أنا عاوزة أبعت تلغراف وبيقولوا انه لو اتبعت من هنا يوصل
أسرع .. اعمل معروف اكتب لى الصيغة أحسن مش شايفة
من غير النظارة .

بتروف : أنا أكتبه لك ؟

آنا نيكولايفنا : أيوه يا ابني انت .. مالك .. يدوب خدت بانى
ان لونك كده مخطوف .. انت عيان والا ايه ؟ لا قدر الله
حصلت لك حاجة وحشة .. مات لك حد من قرابيك ؟ هيه ..
ولا يهكم .. كلنا ليها المهم ان الواحد يعيش ويموت بنى آدم
.. لا حد يزعل منه ولا حد يطلع عليه الى ماهواش فيه ،
يا سلام لو كل الناس طيبين كده زيك .. سامحنى يا ابني ..
انت طبعاً بالك مش رايق .. أما أقوم أدور على حد يكتب
لى التلغراف .. فتك بعافيه يا حبيبى .. وان شاء الله ..
لو كان لى عمر وجيت بلدكم لازم افوت أطمئن عليك ..
فتك بعافيه يا حبيبى .. (تنصرف)

بتروف : (مندهشاً) الوليه دى باين عليها مهوسه .. بترغى
تقول ايه ؟ تعرفنى منين دى ؟ .. (صمت) مش معقولة
الدركاندة الملعونة دى مافيهاش جرايد .. (يقف ثم يتجه
الى الكشك ، يشتري مجموعة من الصحف ، يعود الى مقعده
ويبدأ فى تصفحها) أما أشوف ايه الى كاتبينه عن زيارتى ؟
وايه الصور الى ناشرينها لى .. ايه ده .. ولا هنا ..
ولا هنا .. ولا هنا .. ولا سطر واحد .. لا دى يظهر
الصحافة المحلية متأخرة خالص .. طيب ييجوا وأنا أعلمهم
(يقلب الصفحات) ولا هنا كمان ! ايه الحكاية ؟ دى مسألة
غريبة خالص سرجى كونستنتينوفيتش بتروف موجود فى
البلد دى والا لا .. دا موضوع يهم الشعب السوفيتى
والا لا ؟ (يواحدل تقلب الصفحات) ولا هنا .. لا دا ايه
شنيع .. مافيش احساس بالمسئولية .. (صمت) ..

الوليه دى كانت بتقول « مات لك حد من قرايبك » .. مش
جايز أنا الى مت !

ايفان ايفانوفيتش : (يقترب) كل شىء على ما يرام .. آدى محتاج
أوضتك ..

بتروف : ايفان ايفانوفيتش !

ايفان ايفانوفيتش : أمرك ؟

بتروف : قول لى .. حصل انى مضيت ورق على الوراقف ؟ صحصح
الناس كانوا يقدرُوا يتصلُوا بى بالتليفون دوغرى ؟ بقى أنا
كنت بشيل الماكينة للسكرتيرة ؟

ايفان ايفانوفيتش : ايه الى يخلبك تفكر فى حاجات زى دى ؟
انت لازم تقوم تاخد دشى وتستريح شوية .. عشان بعد شوية
نروح نقابل كونسنتين سرجيتش ولازم تكون فى حالة
كويسة بعد تعب السفر ..

بتروف : ايفان .. جاوبنى .. أنا كنت بشيل الماكينة للسكرتيرة ؟
لازم تجاوبنى .. أنا محتجن .. البلد الواطية دى الى
ما عبرتنيش خلتنى محتجن ..

ايفان ايفانوفيتش : اطلع أوضتك .. اطلع ..

بتروف : مش منقول من هنا .. سيبنى .. ارجوك سيبنى لوحدى
.. ارجع انت بلدنا .. انتظرنى هناك .. أبعد عنى .. يللا
روح انت سافر .. يللا احسن أنا حصرخ دلوقتى !

(ايفان يتقهقر ببطء ثم ينصرف ، بتروف يعتصر رأسه بين

يديه ثم يهوى على مقعد بجسوار الأريكة .. يدخل أبو
كسكته)

أبو كسكته : (يبرز بتروف) أنا جيت أهه !

بتروف : (بفزع) آم .. عاوز ايه ؟

أبو كسكته : أنا مش عاوز حاجة .. مش عاوزني انت ؟

بتروف : (منهارا) وانت ايه اللى تقدر تعمله لى ؟

أبو كسكته : حقول كلمتين من القلب ! حقول لك رأى الناس .

● المشهد الثامن

(حجرة مكتب كونستنتين سيرجيفيتش * على جدار الحجرة صورة لكونستنتين سيرجيفيتش وهي داخل برواز مذهب يكاد يخفى الجدار * الصورة ضئيف حجم صور سرجى كونستنتينوفيتش بتروف * صورتا كونستنتين سيرجيفيتش، وسرجى كونستنتينوفيتش بتروف متشابهتان الى أبعد الحدود كونستنتين سيرجيفيتش منكفىء على مكتبه بفحص بعض الأوراق يدخل بتروف، كونستنتين سيرجيفيتش لا يرفع رأسه * بتروف يجول بنظره فى الحجرة * وتستولى عليه الدهشة اذ يقع نظره على صورة كونستنتين سيرجيفيتش فيقترب من الصورة ويحدق فيها مشدوها بالتشابه الشديد بينها وبين صورته * يرفع كونستنتين سيرجيفيتش وجهه فيبدو شبيها جدا بسرجى كونستنتينوفيتش بتروف) *

كونستنتين سيرجيفيتش : (دون أن يرى وجه س * ك * بتروف) بتبص على ايه ؟

(بتروف يستدير فيتطلع كل منهما للآخر مبهورا بالتشابه الشديد بينهما)

آ - ها *

بتروف : آ - ها *

كونستنتين سيرجيفيتش : انت **

بتروف : انت **

كونستنتين سيرجيفيتش : أنا .. (مشيرا الى نفسه)

بتروف : أنا .. (مشيرا الى نفسه)

كونستنتين سيرجيفيتش : صورتى .. صورتك ..

بتروف : صورتنا ..

كونستنتين سيرجيفيتش : اتفضل استريح سرجى كونستنتينوفيتش

بتروف : (يجلس على مقعد فى مواجهة المكتب) شكرا كونستنتين

سيرجيفيتش ..

كونستنتين سيرجيفيتش : احنا استدعيناك عشان ...

بتروف : (يقاطعه) ماحدش فى المحطة استقبلنى وفى الفندق

اضطريت أقف فى الطابور ، ماقدرتوش حتى تبعتوا لى

الموكوسة بوييدا (١) عشان أتنقل بيها .. خدت تاكسى وجيت

لك بنفسى ..

كونستنتين سيرجيفيتش : تاكسى ؟

بتروف : أيوه تاكسى .. وبعدين السواق نزل نقد فى أوضاع

البلد لما فلق رأسى .. رحمت نازل من التساكسى وراكب

أوتوبيس ؟

كونستنتين سيرجيفيتش : أوتوبيس ؟

بتروف : أيوه أوتوبيس .. طلع ألعن ! مافيش أى ذوق ولا احترام

.. الناس عمالين يزاحموا ويزقوا فى بعضى .. وتصور ..

ما حدش قام لى من مطرحه .. لما زهقت نزلت خدت ترمای ..

كونستنتين سيرجيفيتش : ترمای ؟! هو البلد لسه فيها ترمایات ؟

بتروف : أتارى لسه فيها ..

(يصمتان ويتبادلان النظرات)

(١) بوييدا اسم سيارة ركوب روسية وتعنى بالعربية «نصر» ..

كونستنتين سيرجيفيتش : انت ..

بتروف : أنا ..

كونستنتين سيرجيفيتش : انت .. (صمت) احنا طالبينك عشان ..

بتروف : الترمای کثیب جدا ..

كونستنتين سيرجيفيتش : کثیب ازای ..

بتروف : زى ، کتاب الى مافيهوش کذب !

كونستنتين سيرجيفيتش : (بسخرية) ودا يبقی فيه ايه ؟

بتروف : أهى حاجات كلها ماتسررش .

كونستنتين سيرجيفيتش : (بسخرية) زى ايه ؟

بتروف : مثلاً : الرفیق کونسنتنين سيرجيفيتش انحرّف ولا بد

من ايقافه عند حده ..

كونستنتين سيرجيفيتش : (حانقا ثم محاولا قمالك أعصابه والتظاهر

بأنه أخذ الأمور على سبيل المزاح) طيب .. وانت بيقولوا

عليك ايه ؟

بتروف : تلاقيهم بيقولوا على زى مايقولوا عليك .. بس طبعا فى

بلدنا مش هنا .. الفكرة دى جت لى من شوية فاكشفّت أن

التفكير فى حد ذاته عملية عجيبة جدا .

كونستنتين سيرجيفيتش : وتعمل ايه يعنى .. ما نركبش عربيات؟ ..

نشتغل من غير سكرتارية .. نلغى الجرس ونقعد نهاتى فى

الطريقة لحد حسنا ما يتنبج .

بتروف : لا .. لا .. أنا بفكر فى المسألة دى بمتهى التوتر

والعذاب .. لا .. احنا نركب برضه عربيات . ونخلي برضه

السكرتارية .. السكرتارية دى ضرورية لمصالح العمل ذات

نفسه ٠٠ وطبعاً أحسن الواحد يدوس على زرار مش يقعد
يهاتى ٠٠ أنا المسألة دى معذبانى ٠٠ الواحد ممكن تبقى له
عربية وفيللا وسكرتارية ٠٠ بس يعنى ٠٠ كل ده مش لازم
يتحول الى سور يفصل بين الواحد وبين العالم ٠

كونستنتين سيرجيفيتش : (متجهما) طيب ٠٠٠ نخش فى الجد ٠٠
جوهر القضية ان احنا طلبينك عشان ٠٠٠

بتروف : البلد دى ما عبرتش عن أى اهتمام بى ٠٠ بقى أنا
ما عبرونيش ٠٠٠ ويعملوا زينة عشان حنة بنت مفعوسة
٠٠ قال ايه نجمة رياضية صاعدة ٠٠ زى ما أكون شفتها
قبل كده ٠٠

كونستنتين سيرجيفيتش : سرجى كونستنتينوفيتش !

بتروف : (لا يتأثر بلهجته المحذرة) على العموم انت كمان لو سافرت
مدينة كبيرة ما حدش هناك حيعرفك ٠٠ يمكن سساعتها
تلاقيهم عاملين زينة لواحد سمكرى عاوز أقول انك يعنى ٠٠

كونستنتين سيرجيفيتش : مش فاهم انت عاوز تقول ايه ؟ خلينا
ندخل فى موضوعنا ٠٠ احنا طلبينك عشان ٠٠٠

(يدخل السكرتير ، وهو رجل جاد ذو حواجب كثيفة ، يعقبه
أبو كسكته)

السكرتير : (يضع على المكتب مجموعة التماسات !) (يخرج) ٠

بتروف : (ناظراً الى السكرتير وهو ينصرف) دا واحد من
طاقم السكرتارية (محاولاً تذكر شىء ما) آه ٠ آه ٠ دا أبو حواجب
سود ٠٠ يبقى فاضل اثنين كمان ! واحد بنضارة والثانى أكتر

وشعره أحمر .. كل واحد من الثلاثة ليه نظام مخصوص ..
لكن أنا عارف المعلومات دى منين ؟

(كونستنتين سيرجيفيتش يؤشر على الأوراق دون أن يطلع على
محتواها بثلاثة أقلام ملونة أحمر وأزرق وأخضر ثم يقسم
الأوراق الى ثلاث مجموعات) .

أبو كسكته : (يلفت نظر بتروف) فاهم ايه اللى بيعمله .

بتروف : بيصنف الالتماسات .

أبو كسكته : من غير مايقراها ؟

بتروف : حيقراها بعدين .

أبو كسكته : شايف التأشيرات .. شىء بالأحمر .. وشىء بالأزرق ..
وشىء بالأخضر ..

بتروف : أيوه شايف .

أبو كسكته : اللى متأشر عليه بالأحمر حيتقرى بكره .. واللى متأشر
عليه بالأزرق حيتعاد عشان يندرس أكثر واللى متأشر عليه
بالأخضر يبقى مرفوض . وكل دا من غير مايتقرى .

كونستنتين سيرجيفيتش : (يرفع رأسه فيلاحظ وجود أبو كسكته)
انت مين .. وجاى ليه ؟ امشى اطلع بره ! (يضغط على زر
الجرس) .

أبو كسكته : مافيش داعى تستدعى حد .. اعمل حسابك لو فضلت
ماشى بالطريقة دى حتنطرد من هنا .. وساعتها مش حتبقى
شايف سكة الخروج . (ينصرف)

كونستنتين سيرجيفيتش : آه .. أنا كنت بقول ايه ؟ .. من حيث
الجوهر يا رفيق بتروف أنا كنت طالبك عشان .. انت
سامعنى ؟

بتروف : أيوه ٠٠ أيوه ٠٠

كونستنتين سيرجيفيتش : أولا وقبل كل شيء ٠٠ لابد من استقراء ،
وتحريض وتنسيق وبحث الـ ٠٠٠٠

بتروف : لابد من استقراء (ثم وقد أفاق) استقراء ايه وبتاع
ايه ٠٠ مايجي أحسن نناقش الموضوع بلغة ثانية ٠٠

كونستنتين سيرجيفيتش : فعلا ٠٠ لابد من تشمير الأيدي ، والتخلي
عن السلبية ، ودفع عجلة الانتاج ٠

بتروف : (وقد أصابته العدوى) كما لابد فورا ودون كلل أو ملل
من تجديد وتجريد وتجميع الـ ٠٠٠٠

كونستنتين سيرجيفيتش : لا يا عزيزي ٠٠ أولا التجميع ثم بعد ذلك
التجديد والتجويد والتعديل ٠

بتروف : كونستنتين سيرجيفيتش !

كونستنتين سيرجيفيتش : لابد من بحث وتوقيت

بتروف : (مرددا) لابد من بحث وتوقيت

(من هذه اللحظة وحتى نهاية الحديث يتحول بتروف الى امرأة
تعكس عليها كل حركات وكلمات ونغمات كونستنتين
سيرجيفيتش)

كونستنتين سيرجيفيتش : وتوسيع وتدقيق وتنقيح ٠

بتروف : وتوسيع وتدقيق وتنقيح ٠٠

كونستنتين سيرجيفيتش وسرجي كونستنتينوفتش : (معا) تجويد
وتجديد وتشجيع وتوسيع وتطوير ٠٠٠

(يجري تمثيل صامت وكأنهما يواصلان الحديث بحيث يبدو

سرجی کونستنتینوفیتش وهو يعكس كالمرآة كل حركات
کونستنتین سیرجیفیتش .. الباب يفتح وتلوح منه رأس
أبو كسکته)

أبو كسکته : قف مطر حك انت وهوه !

(يختفى أبو كسکته .. الباب يفلق ثانية .. يرى سرجی
کونستنتینوفیتش وکونستنتین سیرجیفیتش واقفين تلبية
للأمر) *

سرجی کونستنتینوفیتش وکونستنتین سیرجیفیتش : (معا) ايه ده ؟
مين ده ؟

بتروف : کونستنتین سیرجیفیتش . شايف أحوالنا وصلت لايه ؟

کونستنتین سیرجیفیتش : عاوز تقول ايه ؟

بتروف : أنا فهمت كل حاجة .. فجأة فهمت كل حاجة .. (مشيرا
الى الصورة المعلقة على الحائط) أنا دلوقتى عرفت مين اللى علق
صورى وصورك .. هو مفيش غيره ايفان .. عن اذنك أنا
راجع بلدنا فوراً ..

کونستنتین سیرجیفیتش : ايه مالك .. جرى لك ايه .. احنا
طالبينك عشان ...

بتروف : عن اذنك .. أسبوع واحد وارجع لك .. بس بعد
ما أعمل تغيير شامل فى كل الأمور ..

کونستنتین سیرجیفیتش : ودا اسمه كلام يا عزيزى .. يا أعز من أخى
يا رفيق الكفاح ..

بتروف : ايفان ناوى يقضى على .. مش فاهم أنا زعلته فى ايه ..

وعلى فكرة بلدكم أكبر من بلدنا وإذا كان فى بلدنا ايفان
واحد يبقى ضرورى عندكم ثلاثة أربعة .. عشرة ..
ويمكن مية ايفان .. أنا رايج أطرد ايفاننا .. بس لازم الأول
أزنته فى كام سؤال .. وانت كمان لازم تطرد ايفانكم ..
لازم تقضى على كل ايفان يحوم حواليك .. لازم ..
لازم أنا راجعلك بعد أسبوع ..

● المشهد التاسع

أبو برنيطة خوص : بتروف رجع من الأمانة ؟

أبو كسكته : أيوه رجع .. أنا لسه شايفه طالع على السلم جرى ..
بياخد كل أربع درجات فى خطوة .. يللا نقول له حمد لله على
السلامة ..

أبو برنيطة خوص : آه واجب ..

أبو كسكته : (يدفع أبو برنيطة خوص برفق) اتلحج شوية ..

أبو برنيطة خوص : مش حتبطل حركاتك السخيفة دى ..

(ينصرفان)

(حجرة الانتظار فى مكتب بتروف)

بتروف : (يدخل الحجرة صارخا) هاتوا لى ايفان ايفانوفيتش
حالا ..

السكرتير : مين .. لا مؤاخدة ..

بتروف : ايفان ايفانوفيتش .. مش سامعنى .. دور لى على ايفان
فى كل حته .. هاته لى ان شاء الله يكون تحت الأرض ..
بسرعة .. اتحرك ..

السكرتير : ايه اللى جرى له ؟

ماريا أندريفنا : ماله كده هايج !

السكرتير : هو عاوز مين بس ؟

ماريا اندريفنا : ايفان ايفانوفيتش ...

السكرتير : ايفان ايفانوفيتش مين ؟ مش تفهموني ..

(يرن الجرس مرة احدة)

عاوزنى ليه تانى . لا دا باين عليه متنرفز قوى . يظهر الدنيا

حتتدربك على دماغى ..

(السكرتير يدخل مكتب بتروف .. الجرس يرن مرتين)

ماريا اندريفنا : دا عاوزنى أنا رخره .. يا ترى ايه الى حصل ؟

(ماريا تدخل مكتب بتروف . الجرس يرن ثلاث مرات)

تاتيانا : ٣ دقائق .. يبقى عاوزنى أنا كمان .. سترك يارب سترك ..

(تدخل مكتب بتروف)

بتروف : (للسكرتير) لقيته ؟

السكرتير : مين يا حضرة المدير ..؟

بتروف : انت لسه مش عارف مين .. انت مش سمعتنى ..؟

السكرتير : سمعت .. حضرتك طلبت ايفان ايفانوفيتش

بتروف : طيب .. آمال ماجاش ليه لحد دلوقتى ؟

(يدق على المكتب بقبضة يده) ماجاش ليه ؟

ماريا اندريفنا : سرجى كونستنتينوفيتش ..

بتروف : (برقة) لا مؤاخذه .. أنا عامل دوشة .. لكن آه لو تعرفى

أنا عاوزة بفارغ الصبر ؟

(أبو كسكته وأبو برنيطة خوص يدخلان)

أبو كسكته : سلام عليكم ..

أبو برنيطة خوص : حمد لله على السلامة يا حضرة المدير .. أشرقت
الأنوار ..

بتروف : اتفضلوا استريحوا .. أنا دلوقنى مشغول بمسألة مهمة
جدا وعاوزكم تساعدونى .. تويس انكم جيتم .. أرجوكم
شوفوا لى فىن ايفان وهاتوه لى ولو من تحت الأرض .

السكرتير : ايفان ايفانوفيتش مين ؟

أبو برنيطة خوص : لقبه ايه ؟

بتروف : ما عرفش لقبه .. ايفان ايفانوفيتش وخلص .. ثم ايه
أهمية لقبه ما انتم كلكم عارفينه شخصيا (للسكرتير) الله
يقول ايفان ايفانوفيتش .. ايفان ايفانوفيتش بتاعنا ..
عجيبة .

السكرتير : يا حضرة المدير .. لأمؤاخذه .. ما حدش عندنا بالاسم
..

بتروف : ايه ؟ انت اتجننت والا ايه ؟ وانت ياماريا ما انتش عارفه
ايفان ؟

ماريا أندريفنا : ما اعرفش ازاي .. دا أنا أعرف بدل الواحد اثنين
ايفان ايفانوفيتش فراش اللوكانده وايفان ايفانوفيتش جارنا
فى البيت .

بتروف : لا دا .. ولا دا .. ايه الحكاية .. انتم انلى اتجننتم
والا أنا ؟

أبو برنيطة خوص : كنتم دايدا سوا مابتفارقوش بعض ..
والحقيقة هو كان بيعحبك جدا ..

بتروف : عال .. يبقى انت الى عارف أنا بقصد مين ؟

أبو برنيطة خوص : لا .. لا .. لا أبدا .. أنا معرفش حد أبدا
اسمه ايفان ..

بتروف : (مشيرا الى صورته) مين الى علق دى هنا ؟
السكرتير : ساشا .. سواق حضرتك .
بتروف : طيب .. مين الى أمره يعلقها .. مين الى استدعى
الرسام ؟

السكرتير : احنا كنا فاهمين ان دى تعليمات حضرتك .
أبو برنيطة خوص : أنا الى استدعيت الرسام .. ودا شىء أنا
بفخر بيه ..

بتروف : مش قادر أفهم حاجة . مين الى حرم على أفطر فى
الكافيتيريا ؟ مين الى خلانى أخصص قسم عشان يموني
بالسجائر ؟ مين الى علمنى أقول كلام فارغ . ؟ أحشر نفسى
فى الى ماليش فيه ؟ أبقى مهزأ فى عين الناس ؟ مين الى
خلانى أتعس انسان فى الوجود ؟ مين ؟ مين ؟ مين ؟

أبو كسكته : ايفان ايفانوفيتش .
بتروف : مين فرق بينى وبين لوسيا ؟ لدرجة أنى لما شفقتها ماقدرتش
أفكرها مين الى وصلنى للحمامة دى . ؟

أبو كسكته : ايفان ايفانوفيتش .
بتروف : ماأنا عارف أنه ايفان .. أقول لكم كده .. تقولوا
مانعرفهوش .. معنى كده ان انتم الى علقتم الصورة وأنا
عجبتنى الفكرة . يعنى قصدكم ان السكرتير وساشا هم الى
علقوا الصور ؟

تاتيانا : وأنا كمان ساعدتهم .

بتروف : مين الى قسم حمام السباحة نصين

أبو كسكته : ايفان ايفانوفيتش

بتروف : طيب فين ايفان ايفانوفيتش ؟ أرجوكم .. فى عرضكم ..
(صمت) والا ما كانش فيه حد اسمه ايفان ايفانوفيتش ؟

(يدخل ايفان ايفانوفيتش)

ايفان ايفانوفيتش : (للمشاهدين) الا صحيح .. أنا كنت
موجود والا لا ؟

بتروف : (لأبو كسكته) فاكّر ؟ انت زمان قلت لى أما تحتاجنى
اطلبنى .. ادينى بأرجوك .. قل لى .. (مشيرا الى ايفان
ايفانوفيتش) دا كان حقيقة والا وهم .

أبو كسكته : مادام السؤال دا يهكم للدرجة دى .. اتفضل آدى
الجواب . (يضرب ايفان ايفانوفيتش بعصا على رأسه)

(يسقط ايفان ايفانوفيتش . فى اللحظة التى تهوى فيها
العصا على رأس ايفان ايفانوفيتش يمسك بتروف رأسه
بيديه)

بتروف : آه راسى .. آه ..

ايفان ايفانوفيتش : (يرفع رأسه) أنا وايفان ايفانوفيتش .

أبو كسكته : (يعود الى ضربه على رأسه) خد كمان موت . أنا
الى حقضى عليك عليك ياندل .

بتروف : آه راسى .. راسى .. حرام عليك . راسى حتتفلق ..
حاسب حتموتنى .

أبو برنيطة خوص : مش في ^{ناهم}وهم؟ حاجة أبدا • هوو ايفان دا له وجود
بحق وحقيقى والا وهم منى •

(أبو كسكتة يرفع العصا مرة أخرى لكى يضرب ايفان
ايفانوفيتش فاذا هو قد اختفى بينما يرى بتروف ممسكا بيد
أبو كسكتة) •

بتروف : كفاية •• خلاص أنا فهمت الحقيقة •

أبو كسكتة : (للمشاهدين) •• طيب وانتم يارفاق • ايه الحقيقة
فى رأيكم أنا يهمنى قوى أعرف رأيكم : ايفان دا كان شخص
حقيقى ولا وهم ؟ •• ايه جوهر القضية ؟

(سستار)

المطبعة الثقافية

رقم الابداع بدار الكتب ١٩٧١/٣٥٦٤